

**CHASONG GITALO CHADAMBENI A·CHIK  
SEA-JOTANIO JAK ON·PANI**

# **SIKIME**

( " ama ri ng ni sokbiten na gro ni ngama..... ?!" )

**DRAMA TYPE – A·CHIK NOVEL**



By,  
Te. Barnath A Sang: a,  
(Office Secretaryship &  
Stenographer)  
Double ( 10+2 ), B.A.(Garo Hnr).  
Nokil A·we,  
Williamnagar, East Garo Hills.

495.4.1.16  
Class No. \_\_\_\_\_ Acc. No. 13431  
Book No. SAN  
Author Sangma Baruah  
Title Sibome

---

**DISTRICT LIBRARY**  
**EAST GARO HILLS DISTRICT**  
**WILLIAM NAGAR**

---

Accession No. \_\_\_\_\_

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

**Help to keep the book fresh and clean**

CHASONG GITALO CHADAMBENI A·CHIK SEA-  
JOTANIO JAK ON·PANI


# SIKIME

( “ .....ama nang-ni sokbitchina gro rikengama.....?! ” )

**DRAMA TYPE – A·CHIK NOVEL**



By,  
Te. Barnath A. Sangma,  
(Office Secretaryship &  
Stenographer)  
Double ( 10+2 ), B.A.(Garo Hnr).



**“la kitap ang’ teachership-o enia ma·apa  
baksa damsan ong·engmiting salrangko  
gisik ra·aniona ong·china”**



[1]  
**JANAPCHENGANI**

A-chik a-songo kitap sena changgiparang bang-been dongaha indiba ku-tangchi segimin kitaprangko poraina sikgiparang bang-jani gimin bang-batan sena siktokja. Ian an chingni ku-tangna ka-sagijaniko mesokani gita ong a. Anga ia Novel-ko ru-utbea salrangna skangan seahachim indiba adita neng-nikanirangchi chapa ka-atningna man-jaha. Ia segimin golpo angni gisiktangoniko tarie seanisan ong-aia enia ian kitapna ka-sagiparangna poraitobegipa ba jakkaltobegipa ong-janaba donga. Ian adita manderangni nangnikaniko gisikona sokate angna ka donganiko on-ahanichi chapa ka-ataniona sokaha.

Iano janapgimin song ba mandeni bimingrang badiaba biap ba mandeko minga baksa apsan ong-genchimode uan maibakai ong-gakanisan ong-aigen, maina ian golpoo bak ra-giparangko dingtang ma-ekate mesoknasan uarangko donaha. Ia segimin golpooarang a-gilsakni mandeni daka rikako ba kam cholonko nirikie uko janapna miksonganirangba dongja indiba basakoba saniba janggi tanganiona indaka obostarang sokbanaba donga, indake sakgipin manderangni dakchaka gri saksan ong-engmittingo iano janapgimin kattarangchi una ka-dimeataniko on na man aba donga inc mangsonganinasa ong-a.

Anga iano adita katta gitalrangkoba jakkalaha, jekai garini palo kolre, kitapni palo chapmong, koborni palo knanku enia uandake gipinrang. A-chikni minganio bang-an miksongani gnanng bimingrangko donaha, jekai, matchu ba matnokrangni gisepo chubatgipa, matcha ba matskako cha-gipa. Uandake biterangonikoba te-rik ba rongsa ronggipinko rika gita nanggipa bite, te-gatchu ba a-oni chukalao gata gita nanggipa bite inc miksonga gnanng minge jakkala. Indake bimangni kri an-ching A-chik ku-siko dongkugijagipa kattarangko taridape jatni agananiko apalatna man-gen.

Bon-kame iako matchotsrange chusokatna dakchakahanina Ramsang College-ni Lecturer Ma. Martha Ch. Momin (Department of Garo) enia Williamnagar College-ni Lecturer Pa. Sengjang N. Sangma (Department of Garo) –ko mitelna namnikbea.

Uarangna agreba angna iako chusokatna jakko on-pae dakchakahanina pilak angni ripengskarangko enia iako bre-e poraigipa A-chik jat sakantikon mitela baksa pilak angni sikanirangko Sakni Gitelna pakwata.

Mitela.

*Te. Barnath A. Sangma,*  
Ex-Assistant Headmaster,  
Green Hill English School,  
Balsrigittim: Williamnagar

Nokil A'we, Williamnagar, East Garo Hills.





## AGANDAPANI

A·chikrangoba sena-jotna changgiparang bang·en gnang. Saobarang iana ba·kapgipa gunrangba gnang, indioha basakobade an·tangtangari dal·droe silrorona neng·a. Uaranga basakoba o·krie, chiru-a·gate, dilneng-do·mikako man·ode silrorona aro namgipa biterangko nangna man·a. An·ching uandakgiparangko an·tangtangari dal·ako nie dongaigija nirok-simsake nambatatna nanga. Patigimin ba·kapgipa gunrangko nambatatna A·chikjat sakantian dakchakanirangko on·paode nambea.

Gipin ku·sikrango bang·a dingtang dingtang rokomni sea-jotanirang (literary genre) donggenchimoba A·chik ku·siko seanirangde namen komibenga aro badiaba rokomni sea-jotanirangde dongsrangkuja ine aganoba gualani dongjawa. Sea-jotani rokomrangoni Dakmesokna seani (Drama) aro gisiko golpo banaidrae Songsarni golpoko seani (Novel), uarangba mongsonggipa sea-jotanirang ong·a. Uarangko college aro uni-versity-rango ra·naba nanga.

A·chikkuchi segimin songsarni golpo da·o dipet Redin Mominni “Khalsin aro Sonatchi”, Simison R. Sangmani “Swarnalata”-oniko pe·gipa “Sonabal Me·chik”, Icylian R. Marakni “Chigitchakgreni Nokma” aro “Gamseng”, unbaksana da·o gital Prabodh M. Sangmani “Parakgija Ka·saa” aro “Dikreni Gitcam Poto” iarangsan ong·kuainga.

Chasong damberangoni Te. Barnath A. Sangma songsarni golpo “SIKIME”-ko seaha. Ian chadamberangoni ia rokomni seanirangna re·mikkangani aro ja·ku de·ani ong·enga. Ua iano gisiktango golpoko tarie ba gisiko golpoko rike uno bak ra·giparang (Character) –koba ia chasongoni ong·bewalo dakataha. Songsarni golpo badiaba chasongo ong·a obostako janeraogita nikatna man·gipa ong·a. “Khalsin aro Sonatchi”-o Khalsinni ‘dhuti’ gane neck-tie kae juta gananiara ia chasongna ka·dingstekani ong·naba donga, indiba uko segipa mandeni chasongo mai ong·a uko photo-rangoniko nikode ong·bebea ine nikna man·a.

Janggitangani rakbegipa salsomoirang sokbaenganiko niso  
 A·chik jatni dakrong-ka·rongkugijagipa jekon da·alonaba  
 A·chikrang ka·e cha·kujaenga, uan juta sikani aro knirate  
 cha·anirang ong·a, uarangkoba ua ia songsarni golpoo mesoke  
 on·aha. Beben A·chik me·chikrangoni me·chikskako kni ratani,  
 mikkang tariani kamrangko ka·e janggitanggiparangba dongengaha.

Minggipin ua iano ku·gipinchi minggimin bimungrangko  
 ku·tango maidake banaie mingode ba donode namgenchim ba  
 kragenchim uarangkoba banaie jakkale mesokaha. Unigimin  
 saobarang ua A·chikkuona banaigimin bimungrangko krae nikjaoba  
 ‘ong·niksranja’ ine jeaigija krae nikako una uiatode nambea.  
 Ku·tango sal, ja mingani dongoba an·ching ku·gipinko jakkale  
 ku·tangchi mai minga ukode uija aro aganrongja. Uarangko da·alo  
 A·chikkuchi segipa songbadrangko aro kitaprango jakkale  
 mesokode, uarangko poraie gisikona chinaprroe knalo uko  
 jatgimik jakkalna man·gen.

Sea-jotaniara chasongni chasongna gimakamgijagipa gam  
 ong·a. Chengo Greek skia man·giparang Pluto. Aristotle uamangni  
 seanirangko an·ching ia somoionaba poraie, uamangni  
 chanchianirangko uina man·enga. Uaragara gamchatgipa hira,  
 mukta aro sonana bateba gamchatbatsranggipa ong·a.”SIKIME”-  
 ba A·chikku sea-jotanio gimagijagipa gam gita ong·gnok. Uni gimin  
 chadamberang gimagijagipa gam aro bimungna gisiknange jatna  
 gimagijagipa gamko on·gilna jotton ka·na nanga. Sea-jotani a·bao  
 uarangkon A·chikjat nang·oniko aro angoniko nangenga.

Dated: Williamnagar,  
 The 13<sup>th</sup> July, 2002.

Sengjrang N. Sangma.  
 Lecturer,  
 Department of Garo  
 Williamnagar College,  
Williamnagar

**KU·JAPANGRANG****CHAPBIDILRANG :**

1.	Deskang enia Sikimeni atchia.	-	-	-	1
2.	Deskangni branga.	-	-	-	3
3.	Ka·saniko chea.	-	-	-	7
4.	Sikimeni me·tran' salrang.	-	-	-	10
5.	Songgipinchi ku·mingna re·anga.	-	-	-	14
6.	Saljatchi enia Balikim.	-	-	-	16
7.	Balikim enia Sikimeni gronggrika.	-	-	-	17
8.	Sikime ripengtangko gimaata.	-	-	-	24
9.	Disenni Bilgrikkō skanggipa gronga.	-	-	-	30
10.	Saksani dukchi sakgipina kusi.	-	-	-	39
11.	Mikchian ka·saako rikani krong.	-	-	-	43
12.	Chawari sing·sruka.	-	-	-	49
13.	Sokbitchini gro.	-	-	-	55
14.	Janggi gimagija sia.	-	-	-	61
15.	Katchan sal mikchin wario.	-	-	-	66
16.	Kaman dal·a chusokani.	-	-	-	70
17.	Balikimni bon·kamgipa salrang.	-	-	-	74
	<b>A·BACHENGANI.</b>	-	-	-	<b>86</b>



**“DESKANG ENIA SIKIMENI ATCHIA”**

Salgisakni kokkimaon nitobegipa tangsekgilgil a-gilsakni a-bigilchi pindapgimin a-a ki-tikbrini kosako jokenggipa chiring dilgnini gisepgriko gittim damsa gnangchim. Ua gittim A-chik a-songni salgipengchipakni a-biding dakbae saliramo bon-choteachim. Ia janapgimin gittimo chonbegipa nokdang ge-sa gnangchim. Ua nokdanga choliade ong-ja indiba kraa gitan cha-na ringnade chu-ongen man-nachim enia uano katchaanian gapachim. Attam balwa nangchakram pringni sal teng-chakram, rona rotobea, dongna dongtobea biapo dongengmitingo chachaon nok an-sengatgipa sara jekjakatgipa Patigipa Ra-rongipani ka-sae jaksramanichi skanggipa depante ua nokdango atchiaha.

Baditaba salrangonian nokni nokgipa, deni pagipade deko mikkang nikna jikko ama inatna enia an-tangko apa ine okamako knana sengsopaenggipade da-o deko mikkang nike baditan kusi ong-bengnok. Ma-gipaba ja-skuna oko ke-e, kosto sitengtoa chake, an-pakani ja-mano deko mikkango done, “inga, inga” grapako nachiltango knac, oktangoni ong-katgipa bi-sako jako de-dingdinge badigitan ka-srokbenggnok. Deko mikkang nikna skangan katchaani nokdango dongsoe, da-o demikkang nikani ja-manode mairongpilen, katchaani baridapenggnok ukode uamangsan ma-sianok!

Jikni an-sengbakalo, deko gandil ratman-o, A-chik jatna krara bimung deminge okampana skanggipa degipa ong-ani gimin uko “Deskang” ine mingaha. Demikkang nikan saloni uamangni nokdango piltaike ka-sagrikani enia katchaani baridapaha indiba bilsibrini ja-mano rasong mikkang nichange grianichi gnigipa an-pakanikanio demechikko mikkang japinike nokko rakkinagipa Kalkame, gamko simsaknagipa Rangrime nokmechikan jakpa ripripari jrinjrotni nokona neng-takna re-angaha. Ua demechikni a-gilsako mikgaoan ja-mano sinti do-pilgime skimna ma-ringna nangahani gimin uko “Sikime” ine bimungkon donsrangeaiaha.

Deskang enia Sikime ma-agri adasa paa dongoba simsakgipa nokmechikgrie do-bisa branga gita brangna nangaha. Pagipa da-o

chonbegipa bi·sa sakgniko nirokjoljole kamrangko ka·na neng·nikaniko man·aha. Uni gimin ua jikgipa gitalko ra·taina draataniko man·aha, indiba ian Deskangnasa ka·beani ong·skaha, maina ua aditan dal·kalahachim. Uni gimin ma·detangara pagipa dongja dongjaode ukorarasa kam ka·ate an·tangde ma·nokma gita janerani mikkango asonge palap daksimnasan choliaiachim, enikoa ka·saninggija dake uko saironga dokrongachim. Jeni giminan indake aganani gngangchim: “Ding·a, ding·a inoba salgitade ong·ja, ma·de ma·jong inoba ma·gitade ong·ja.” Deskang mamungkoba gisiko chanchina changpaku·jae pagipana agane on·sorongoba ma·detangan un mikkangode namnika dake mesokani gimin bebera·jachim batesa bikpile detangkosa denggu ine pangnan dokpilskarongachim.

Bilsi chi·gnimang ong·ahaon ua kalim·katchaeba chugipa gadangni skian·nokona sokdopaaha, da·oa pagipaniko dangga bi·e chapmong·rangko bree ku·mingpana inoba ma·detanggipa namjani giminan una kratchapaachim enia indaken ripeng skaragoniko bi·amjojoe ku·mingemangba ua uian·chet·onade ga·dapaaha. Uni indonga ka·bearangko nike pilak uni ripengskarang una ka·saskachim, mongsongbate uni ku·mingrimskarangoni dambeatgipa me·tra saksa Rokime minggipa una bang·bata salon dakchakaniko on·batrongachim.

Rokime saksa namkalgipa nokdangoni ong·achim enia una agre nokdango degipingrichim. Ua saksa kam·kam demechik ong·ani gimin uni ma·apa una ka·sabeachim enia jegita ua dangga nanga pangnan jechakgijan una on·rongachim, uchin ua ripengtang Deskangna dakchakskarongachim

## CHAPBIDIL-1.

Ku·a gital jakkalgiminni miksonganirang: -

Enia: - Aro, Enikoa- Aroba,	Dangga- Tangka, Uianchet- Class-VIII
Uian saka-High School;	Uian Ma·jatchi -Middle/ U.P. School;
Uian A·bimik -Primary School;	Ka·bea: -duk; Ma·nokma-Rani;
Panokma-Raja	Chapbidil-Chapter; Chapmong-Ki·tap,
Ku·minga-Poraia.	

[3]  
**CHAPBIDIL-2**  
**“DESKANGNI BRANGA”**

Salsao Rokime an-tangni atchian salko gisik ra-manchian salo Deskangko gisiksan katchanio bakrimpachina okamataha indiba ua noko kam ka-e choljokgijanichi re-bapana man-jaha. Salgipino Deskang sean (kolom) ge-sako ra-e uko gronge una on-nani gita on-e agannaha, “Rokime anggo iana agre mamung gamchatbata on-nani gri. Na-a ang’ ka-sae on-aniko ra-chake ia pen-chi apalbegipa u-ianiko taningo see ra-e a-sako an-tangni gisikko bariatho enia u-ianiko gipinrangna see parakbo!” Indiba Rokime an-tangni agannatan salo sokangjahani gimin gisiko ka-kame uni on-naniko enia agannaniko knachakjaha batesa uko namrenge gipin baksasa ku-sree re-angaiha. Ia uni namrengani Deskangni ka-tongo rang-gitik nangchakeaha enia nambatsranggipa besani namrenganiko man-e gisiko ka-bean gape grapsijosijo mikkrone mikchian suake saksansa sikdikdik ma-brange noktangchina re-pilangaha. Uni re-pilangan ja-mano Rokime uko sandie nibeoba nikjaha maina uaba Deskangoni chel-e dongchanade an-tangan man-jawachim. Indake ua uni nokchina sokpile re-bae nion uni jakchakpilgija me-chik suri dake kam ka-bengako nikaaha enia un kosako ma-detangni saia intatakoba knac an-tangni una dakgimin kamrangko nipilate gisiktango duk man-beaha.

Salgipino, Deskangni skiannokchi re-baengmitingko nichaksoe ua un baksa apsan re-pae ku-srena jotton ka-beahachim indaioaba ua an-tangni miksonganiko chu-sokatna gita on-tisamangba man-srangjaha, maina uaba an-tangko gisik saatbeahana ninie, uni agannako knachakna kniding dingsamangni gitaba salja-kuko jakkalna ku-rangchi ong-jaoba kamrangchi rakbeen jechakenganiko mesokengachim. Rokime da-o me-chik gisik ong-e skatangkode je dakeba chu-sokatnan siktelaiahani gimin an-tangan kema bi-e uni krua dokraoni sean-ko ra-e, an-tangni jakgitokni saltokruko oke uni krua-dokrao sikate indake agannaha: ‘Deskang na-a angko kema ka-na man-jawaha ong-oba ia saltokruko jakgitoko ganne uni wilwilenggipa minute-second-ni jakrang baksa ja-kuko de-e nama miksongaona re-angbo” ine mikchiko u-site an-pile re-angaha..

Un attamo Deskang gisiktango ka-beako ra-bite so-sojengjeng ong-e, ka-tongo saknaako man-e nokoni kamrangko ka-engachim unon rang-gitik ma-detangni saiani ku-a un ka-tongo matsrambegipa ate achokchi ka-saninggija dake su-protea gita nangeaha. Haida ua ma-detangni pilak saiani ku-arangnan chakchikna man-naba gnangchimkon indiba uni ka-sabegipa ma-gipa sagiko “me-tramittingo denggu dakesa an-pakao sia, ukon dedrangba man-aia, ingipana chakmatjae unbaksa jegrikaha. Uamangni bil-ting-bil-tang jegrikmittingchachao pagipa sokbachange Deskangko dokaha enia nokoniko a-rikgale saiaha. Danang Deskangde mamungkoba dakna chol nikjae grape dongaiaha, maina kakketko agangenchimoba pagipaan bebera-jawachim enia sakki sabitna inoba ua ku-ako aganmittingo nogipa Sikimede tusibengachim.

Da-o ua maiko dakgen ma-sijae, walgimik tusipilgija chanchiaha, noktang ine ua nokko channaba pagipade donga indiba ma-giparagri, chakchike dongangkuna inoba katchanin gri. Salantian do-o gisikaoni salnapna gitchaksrie walmin-dik seng-wat wa-alja snamona kingkingba saia intatan tipchangjachim, uni kosako kam ka-en ku-mingpanaba man-pajachim. Kamba inditan bang-ade ong-ja indiba ka-srapgija baonikon mingsani ja-mano mingsa ge-etroroa darangan nigampaigipade bebera-nan man-jawachim enia unbaksana ma-degipara banjisa ong-achim. Deskang an-tangni pilak ka-bearangni gimin walgimik chanchie mikkrononi singsolenggipa mikchirang baksa ma-gipa sagiko gisik ra-e, “Ama nang` dena mai ong-enga na-ara nikpaengama? Apani jikgitalde chingkode nokoni deegitan jakkaljaengjok! Gose, ama na-aba nikpaoba bila sokja, ka-ara amja, him angai, ine wagam chikmijile me-mangchisa ma-ring skimaenggnok! Jeba ong-china angade nokoni ong-kataignok, na-a name Sikimekode nirok sandiaibajok” ine agane nogipani turamchi napangaha. Turamo nogipani sarigri tusiengako nie wal-nokko saldoe, uni knirangko rimroke, “Nono an-chingde a-gilsako ba-rima sakgnisan,arang gipin sepangkala mahariba dongpajae, sa-ko ma-de ma-jong chanpana, sa-ko ada-mama ra-pana. Ma-detang kam-dak, apani jikan de chanjahaode sano ka-dongpana. Na-a jedakeba dongaibojok, ka-srokeba-kalimeba janggimangmangko tange rakkiabajok, angade sioba tangoba re-angaignok. Tangoara challang, sioara me-mang, rasong gnange Nokgipani rakkiachi



janggimangmang tangkua ong-oara changsao gronggriktaigen. Nang-ko da-o rime re-nara ango mamungba pangchakanigri, enia demesae agane dongnangoba na-ara ja-rikpana am-aigen. Dadade angkode saksanko gale katangaia inemangba aganne matnangeba roaibojok". Indine ua sebichit kingsako see bolpilmao done nogipani petopo ku-dime, mikchitangko u-site ong-katangaha.

Changgittam do-gisikani ja-mano seng-na an-dalsikmittingo ua ripengtang Rokimeo dakgualgiminrangna kema bi-e re-angna mangsonge uamangni nokchipakna mikkange re-angaha. Ua sa-ranga sin-karisa ong-achim enikoa uno maibakai rasong gnangbeanichi Rokimeba un pringo pring-rama dakna ba-ran ja-kopko gane saksan ong-katbaengachim. Rang-gitik ua Deskangko nike uaba apsan miksonganiko daknan ong-katahakon ine chanchie uko singsoaha:

Rokime: - Aiao, da-alde rasong gnangbee manchisoa gita sakgnian gronggriksrangake! Na-ara salantian ong-katrongengama, ma da-alan skanggipama?

Deskang: - (mikkrono mikchi baksa) Angade nokoni katangengjok. Je nang na gisik sagnirangko dakmanahachim, uarangna nang-o kema bi-nasa re-baenga.

Rokime: - Mainasa? Maiba ong-ama ? Na-ade an-tangde katangengjok indiba nang' nogipa enia.....! (an-tangko miksonge).

Deskang: - Ang' nogipana agre enia sawa? Ang nogipade dongaichina biade seni alduako cha-nagipasa indiba angara an-tangan ga-brite cha-dilnagipasa.

Rokime: - (gisiko ka-bea gnang) Angni giminde chanchijawama? Angara gisik name chanchina changjani giminsama, ma maibaan ong-ahama? da-ora nang' katangna am-ako knaora ka-tongan an-sri moa gita dakenga (ka-tongtangko rim-e a-ao asonggopa).

Deskang: - Maisa ong-engjok da-aa?

Rokime: - (skatang gisiko chanchie) Angade nang-na ka-saengakon! Ihing angade nang-nan ka-sachongmota, ambino na-ara angona re-bapilbone. Angade see ra-na inode nang-kon ra-aignok. Na-a re-baa re-bakujana kingkingde nang-ni jik ong-e nang-kon sengsoaigen.

Deskang: - (nawang dake) Aia, maikosa na·ade indake agannengjok. Na·a da·o angna maiko agannenga ukode na·ara ma·sikuengachima? Da·o na·a nang·ni dambegipa gisikchin an·tangni janggi tanga gimikna agansamsona maikai ka·dongjok me·chik! Na·ara maikosa skatang kore itenga gita jari dake agannengjokai!

Rokime: - Oe, beben anga bilsu chi·sasan ong·engpiti indiba jeko nang·na agannaha ukode pe·jawaha. Indake ong·genoba na·aba gipinkode sanditainabeha enia je biapo ong·oba angko gisik ra·bo. Anga ianon nang·ko nang·ni jik ong·na mangsonge siaonaba sengsogen (krua dokratango cha ringna ra·bitgipa dangga gong sotdokko on·e uko watataha).

Deskang uni aganna ku·ana aiao inmanpile gisiktango jajrenga gnang, “De dongbone”, ine aganwatari jara change chanchiroroe re·chakatna a·bachengaha. Adita uoni an·pile ja·ku kolgrikmang re·jitkuengon ua re·bagiminchiko nipilatoa, Rokimeni ka·tong be·e mikkrononi tingtotenggipa mikchirangko u·sitgija ka·sne ka·sne ja·rikbaaniko nikataha. Deskang ua dambegipa pegitchakchak dosigrigipa me·trani ka·beako nika an·tangni skoko narongreng gisiktango nangchakeaniko mesoke jaktangko bawange skochi gaggue uko an·tangona okamataha. Rokime ka·beachi ka·dingsmite skoko gagguchake uni ka·bakona chasinapangaha. Deskang uni rinokbalbal petopona jakrangko snilate chimik gita tipchanggija jokrsuruenggipa ka·beani chianchiko u·site, rang·gitik an·pildate uoni re·angaha. Rokime an·tangni skanggipa enia bon·kamgipa baseanio an·tangko a·sakni gipin me·trarangni gisepo rasong gnangbatsranggipa ong·chongmotaha ine ma·siachim. Unbaksana ua an·tangni basegimin me·asao pangkimen ka·dongachim enikoa ia ka·donganian uko saksan dongrikna bilko on·naha jechin ua an·tangan an·tangko ka·dimeatna dakchakahachim.

**CHAPBIDIL-2**

Ku-a gital jakkalgiminrangni miksonganirang: -

Sean-pen/kolom	chapmong-ki-tap	sechit-lekka;
wal-nok-lamp;	bolpilma-table	a-dikprak-minuteprak
arimprak-kontapprak;	mikjappprak-secondprak	knanku-kobor;
salja-ku-somai;	saltok-calender;	saltokru-ghori
pringramā-morning walk;	kruan dokra-pocket;	ku-srea-golpo
ku-perarona-translation.		

---

**CHAPBIDIL-3****“KA-SAANI KO CHEA”**

Pring wal seng'ahaon ma-detanggipa Deskangko chakatningjana sai-intate uni turamni dogako o'e niora bangbanggipa dringkosan nikaiaha. Ua an-tangni ka-saninggija dake jakkalarangko chanchie bachiba katmikbrange sina bon-na kenchake ka-simang oksimang dake Sikimeko enia pagipako okame grapjoljole sandiaha. Sikimede adatangni giminde mamungkoba ma-sipajae ma-detangni grapako knaesa da'alde maian ong'aha ine turamoni chakatkringkrangoa polpilmaoni sebichitko nike uko oprake niaha.

**SEBICHITO SEGIMIN: -**

Nono Sikime,

Angade ia nokoni chel-begipa biapchi re-angengaha. Na-a babako name nisobo, angni giminde jajrengchaknabe enia sandinabe. Anga ta-raken re-bapilgen.

Nang-ni adatang,

**DESKANG.**

Sikime adatangni seangako ku-mingmane ka-beaniko man-nahachim indiba pil-sara ka-srokchakbeebea nikpilaha maina gipin sinjetako man-ne sitengtoana batede jakgitele sinti-do-pilgimanian nambatkalkuengachim, ma-detang enia pagipani so-sojengjeng dakengoba uade namrenga gnang, angchia mai nangpaa ingipa gitasa dringtangoni ong-katbaaha.

Ma·detang: - Sikime, Deskangara bachi re·anga. nang·na aganangjama?

Sikime: - Grañg chae bilbrang gimin do·okoara sandioba baoniko nikgnoksa. Banonan bilbrange banon ma·chakeenggen darangba ma·sija.

Pagipa: - Im, gitchia amchakjajokode re·baara re·hapilaigen, siara sijawa, okkrijoko oktangna ga·brite cha·nara changaignok.

Sikime: - Ka·saaniko sandigipade gitchiako ma·sija, bidana branggipade ga·brite cha·na nangja. Unigimin angni adatang jena miksonge re·branganga anga uko ma·sia enia ua chu·soktelgen.

Pagipa: - Denggugiparangan namana miksonge re·angpaenggende, poraina inoara dakchakjaenga inosa.

Sikime: - Iade na·songni mni Do·reng Wal·kusiko poraimitting chasong ong·jajok. apa. Lekkani kosako lekka, ki·tapni kosako ki·tap nanga bang·a. Bebegitaba poraigipa bi·sanade kraa gitan katchanikoba nanga. Mamung saloba neng·skime sintian baksa mikchiko besa kaede nama gadango chu·sokgipa ong·na man·jawa. Unikosako songsarni gitaba ma·sie ra·na gita agitchaa salja·kukoba nanga jedakode ripengskarang baksa ma·siatangtangko badinggrike uianiko apalatna man·genchim.

Pagipa: - Mai kam na·simangara ropettange wakgita do·ogita ra·bae on·nako wange cha·soana agreea. Pagipa maidake mikgil sie kratcha·a man·ne ra·bae on·nenga unigiminde ki·sang·sko chanchian gri.

Sikime: - Ah, namahaba, noko mai a·sel ong·enga uko nirok sandigija cha·aniko mangmang ra·bae on·nana agre nang·ni mamungba kam dongdapjaha ine na·ara chanchiama? Na·a nang·ni dedrangni neng·nikanirangko basakniba salrango changsasikmang sandie niahama? Dongjane, baba dongja, batesa neng·nikani kosako neng·nikanikosa on·dapaha. Enikoa da·o chinga paani noko dongmittingon wakgita do·gita ra·bae on·nako cha·ja ong·ode

nang·ni sian bon·nan ja·mano gipin nokosa indake cha·boma? Ma, chingni ma·gipa dongjahani gimin da·oara chingkode detang gitan nikjahama?

Pagipa: - (waki-mikki dake) Dokatsranggen nang·ko anga, dal·batakoba dal·bata minggija achak wa·pek dakani a·selan anga dongjamangmangode na·song kajia daktokenga. Ua nang·ni ma·detangde na·songni ma·gipa ong·jama?

Sikime: - Oh, chingni nang' jikgital baksa janggi tanganide salgi enia chu·begipa a·bri gitasa dakaia. Chel·beaoni nang·gita nigampaaigipade salgio nangtinge a·bri enia aramko katchae rorimenga gita chacha nikataia indioba sepangona re·ange niosa baditana dintanggrikbea ukode ma·sigenchim.

Pagipa: - (Sikimeko natengo bilsa satkape) Jrip dong sala gati me·chik, maikosa bi·sa mikkilek mangmang me·chikma gipi gita aganna dakbaenga, intangode nang·koba ba·ra gorurue a·rikatsranggen.

Sikime: - (grape) Dal·batana aganchakgija dongaiode dal·batgiparangni ong·gija dakaniko kakket jerara aonan ra·bana man·chipgenma? Ihing ong·ja, unigimin angade jrip dongjawa, nanga ong·ode na·songan ong·katangsrangbo iade ama sagini noksa. Da·sionin mai ong·genchim anga pilakon ma·sisoenga, pangnan dal·batgiparang mamung saloba chonbatgipachi an·tangtangko amna on·rongja. An·tangtang maiba gualaniko dakaha ine nikoba dakgualatangko ra·chakani pal chonbatgipakosa jrip dongatna namnikbatronga. Mai, a·gilsako mande me·apa me·chikma ong·jokode, skia poraia chu·sokahaode pilakan an·tangtangko gimiknian rongdik ine chanchiama? Nibo, baba, chinga nang·jikmung melina man·genchim enia ua chingna ka·saode maina biko ma·gipa ine channa neng·nikgenchim. Indioba sokbitchini palo chipuni sianchikosa kanna am·ode darang dean uko ringjawa unbaksana ama ine okamjawa. Ia nang·ni jikgipa ma·a ong·e atchiana bate skal bima ong·e atchion a·gilsakna nambatkalkugenchim.

Unon rang·gitik ma·detanggipa Sikimeni agana ku·arangna

gisiko nangchake ka·tongko maibachi su·pretata gita saknaatako man·ne ka·a be·e uko gipake grape agannaha, “Angko ama ine okamna man·jawaha ong·oba kema ka·bo, maina anga darangdeni ma·a ong·nan krabebejaha.” Unon Sikime uni mikchirangko u·site , “Na·ara angni nambegipa enia ka·sabegipa ma·gipaan ong·aha. Darang nang·ko ama injaoba angnide amaan ong·a,” ine Sikime an·tangni skimgipa ka·tongko ra·bite ma·detangko ka·dimeataha. Ia ong·a a·selrangchin pagipa ma·detangni uamangko namgija dake jakkalaniko ma·siaha enia ua sal intalan ma·degipa gisik pil·aha Da·o uamang nokgimikan Deskangna kalimbeaha indake ian pagipani a·bachengo kaketko sandina ja·manchakanichisa enia mongsongbate ma·detanggipani mande salgita dakjahanichisan ong·aha. Ia pilak a·sel ong·anichi uamangni nokdang katchagipa. enia tom·tomgpa ong·baaha. Sikime ka·srokbee ua nokdango donge be·en bimang an·senge, bikap an·dil ba·range nitogipa me·tra ong·baaha indiba ia katchaaniko man·na gita ua an·tangni saksakam·kam ka·sabea adatangko gimaatna nangaha. Uni giminan indake aganni gnanngchim, “Maiba dongbimangko man·na gita maikobade galskana nanga”.

### CHAPBIDIL-3.

Ku·a Gital Jakalgiminrangni Miksongani: -

Bolpilma-Table;	Salja·ku-Somai;	Sebichit-Chitti
A·selra : - Obsta;	Sechit-Lekka;	Uidik-Bida
Dongbimang-Bostu.	Dring : - Room	Uidik : - Bida
Dring-Room;	Sianchi- Bisi	A·selra : - Obosta

---

### CHAPBIDIL – 4.

#### “SIKIMENI ME·TRAN’ SALRANG”

Deskangni nokko wat·e re·angan ja·mano Sikime uni ma·detang enia pagipani ka·saniko man·aha, uano chi·a toa tap·e pil·e niman·jaoba, be·en bitin salsisi cha·na man·jaoba nokdango tom·tomani unbaksana katchanian gapani gimin uamangni

nokdango panokma saksani nokna baten rotobatachim kangalni  
 nokdango atchie, ja·skil jakskil noksik nokbak repidapna  
 man·pajaoba, be·en bimangna namnama nong·nonganiko pilna tapna  
 chol ong·pajaoba, ganna·chinna sila·namako be·en ma·gape  
 bimangna kra·e kruna·wentongna dongpajaoba, bata Saljong  
 Me·chikna prap gongdangni mitena. Me·tra nitooba, bilsu chi·chet  
 gapahaoba dongnapgipako rakkia dongpajae noko wal·kusi chake  
 biljimbee kam ka·genoba nitoan dimelja, ja·skil jakskilan simtekja.  
 Sawa uko nitingaride kangalni demechik ino bebera·genchim, haida  
 bilsu sotchet ong·e wagam ko·chet beman·giminmangba su·gipani,  
 “atchu, atchu” ine okamakon gualpile chadengdike uko nimanaba  
 dongachim! Saoba nikpakugijagipana agane ropaode agangipakosa  
 tol·a inpilgenchim indioba haida nikode na·amangba maian  
 ong·pilgenchim darangnaba ka·dongchaknan man·piljawa. Gisik  
 sontola, ku·rang ka·sina nikon ka·sanapaigen, gun gnange  
 suakpilanina re·pakon muni pu·aigen, uni knia tingsronga  
 kang·kareona soka, rimitchrichri tangsimbitbit balbrengbreng  
 ka·tongkon salnapila. Pegitchakchak cha·na gitik, tap·o chi·su  
 chi·susa, sreo done minokato jrotjrot napsu napsusa. Ka·dingsbit  
 ku·chil gitchak wagam kitma bitchri, mikkron mikjap ~~simdik~~  
 simdik, ku·rang ka·sri ka·srisa ka·beako man·e janggi tange, kangilo  
 atchie, daknangbejok chinangbejok rasong gnangbee nokman deba  
 miknapainok nike, agitalde nitatman·pilgen re·na gualpile.

Sikime ia bilsio matric nian·ko sena am·engahachim indiba  
 maiko dakpagenchim un’ bimang silade indinsa, uni gun gnangade  
 sokjok dukonasa maina ru·utbea salrangonin pagipa sabengachim  
 enia una sampil·sampaten dangga bon·pilahachim. Duk·mikchi  
 baksa ku mingpae uidik bidilmaona sokaide indinsagnok, da·oa  
 paltak segatnamangmangba unode dangga·an dongpajachim.. Uni  
 gimin ua an·tangni nokdangni ong·gramaianirangna chanchie  
 grapbeaha enia bilsu gipinosa seainok ine pagipnade mamungkoba  
 janapgija donaiaha. Pilak ia a·selrang ong·genoba Sikime saksa  
 rasong gnangbegipa me·tra ong·achim maina uni chagronggipa duk  
 mingantian tin·kagimin chini bimanggita jingjronge bon·angaiachim.  
 Uni ia ka·dongsoagrigipa wario gitchoengmitingo uni nambegipa  
 ripengtang Disen uko grongaha. Disen saksa chonaonin ma·apagri  
 brange janggi tanggipa ong·achim indiba ua mamungni giminba

chanchie kalimgipa ong·pajachim enia gipinni dukoba nikna sikjachim. Ua saksan-tangnakride chanangkalgipa unbaksana gisil ka·singipa pante ong·achim. Ua an-tangan bading-chiwalaniko daku ku-mingpaengachim maina ua uidikna namen mikbokgipa enia ku-mingna gisik nang-begipaba ong·achim. Uamang sakgnian apsar chasongni apsan skiannoko uidik a·bimikonin (primary school ku-mingrimgipa ripengrang ong·achim.

Disen: - Sikime, na·a exam-na form fill-up ka·jokma?

Sikime: - Aiao! Angade ia bilside donchengna am·engjok. Baban saan nam·jaenga, una sam ra·tingen tangkaba dongjajok, un giminan janapgija donsrangajok.

Disen: - Aia, maisa bilsisa bilsisa indin nasi-nasi galatainoksai Angade man·ode re·anggimin salja-rangkon jegita ong·oba jotor ka·stapemangba bre·genchim. Na·aba me·chikbamo, saksar ripenggri brangenga gitasa. Je ong·oba da·o dipetde nang·n ripengtang Disenara sikujachimba, mainasa mejaoni dongjaora janapjajokai na·ara. (Krua dokraoni ka·tomrako bikote, dangga gong ritchagni-ko saloke). Ha, ia knalon last date ong·engjok ta·rake ka·ebo.

Sikime: - (Ra·chake) Aiao! Angade nang·kode maidaker mitelpilnok, mitelna kattakon man·piljajok.

Disen: - (Baleke) Mitelanabatede cha·chat so·mike olakior nambatgen.

Sikime: - Balekja bebe, mitelane, basakoba man·ahac on·pilskaainaha.

Disen: - Nang·ko anga on·pilchina ge·etengama? Angade angni ripeng skarangni ka·abeaniko nikode nimatja enia na·aba angko ka·abeatna sijka ong·ode on·pilnabe indiba angni neng·nikan salo angko watgalskanabe.

Sikime: - De, indake ong·ode mitela. Hai chingni nokchi re·kubo, babani saako niangkande.



Disen unbaksa nokchi re·angpaaha enia Sikime an·tang ma·apana uamangni ripeng ong·grikaniko talate on·tokaha. Ma·detanggipa demechiktangko una do·o doke mi songe on·atchina ge·etaha. Disen cha·man ringmane noktangchi re·angpilaha. Uni re·angani ja·mano Sikime·ma·degipa enia pagipade ukon una jakritingate on·srangna ine gisiktangtangode chanchie donaha maina uamangde ka·sa namnikgrikenga inesa chanchiskaengachim. Maibakai Sikime uamangni mitumitu chanchisrete golpoengako knadikaha:

Sikime: - Maidakesa na·songde ango sing·cheng san·chenggija ong ai ong·jai chanchitokengjok.

Ma·detang: - Ma, na·ade Disenko namnikpaja? Mandeara nampabeaba da·nang!

Sikime: - Mandeko namja ine jegalade ong·pajachim indiba chingni gisik ka·tongode da·o dipetde indake miksonganirangde dongpakuja. Bebegitaba sawa angkora ra·pagnok da·nang, angara kangalni desa cholipaja ma·kipaja, mikkangan amak mikkangsa·bimangan do·ka gitasa.

Ma·detang: - Da·on sing·e san·e nipabo. Mandeara nambea ja·manode gipinsa tap dakainok miknapa miknapjanaba jike mong·e nipaosa gimikkon ma·sipagen.

Sikime: - Ma·deba na·aba, nang' demechikora segri randi sina kenchakengama? Ja·mano jike niaina da·ora salja·kuba sokuja, man·nanaba man·janaba kolej·o poraie nichengkuna. Indiba jawa gipinrangna agapanabe. Disen knapilode gisik sakamnaba donga.

Ma·detang: - Mainasa, jawarangnara ku·jokatainajok na·songtangtangsas. (ka·dingsmite nokningchi napanga enia Sikimeba skoko narongrenge dringtangchi poraina re·anga).

Chapbidil – 4

Ku·a gital jakkalgiminrangni miksonganirang:

Paltak: - Form

Paltak segata: - Form fill up

Ka·tomra: - Money Bag/Purse

Nian: - Exam.

---

**“SONGGIPINCHI KU·MINGNA RE·ANGA”**

Sikime enia Disen matric nian-ko see uni kambitena (result) sengsoengachim. Salsao Wa·sosi jani gnigipa antio Disen Sikimemangni nokchi rona re·baaha.

Sikime: - Disen na·ara result-nara ka·dongsopaengama? Maidaka jumangrangko niksopaenga?

Disen: - Jumangde nikagri indiba namaigen na·a.

Sikime: - Na·ade namainaba donga angasai indakpile kensoengawai.

Uamangni ku·sreengmitingo Aminchi kambiteni chapmongko ra·e re·baha. Rokime uni bilsa chi·bong ong·engmitingo maiba sanamgija saaniko man·ahachim. Rasong gnanabee sama·chik ojarangni san·aniko man·e ua namaha, indiba uamangni bebe ra·anio gita uni bimingko mingjena nanganio ga·akaha uni gimin da·ode unsalonin uko Aminchi inesa mingbasikaha.

Aminchi: - Na·song Matric resultni gimin golpoenggiparangara result-koara nikpajokma? Nikkuja ong·ode ia anga Booklet-ko ra·baba.

Sikime: - Bao nina, aiao, angade gittamgipaonisa nidogen (sulsul nianga). Ianode dongjasai na·a.

Aminchi: - Na·songara sakgnian second divisionosa pass ka·tokanaba, na·songni teacher-an aganatenga.

Disen: - (Sikimeoniko ra·seke) Iara bebeke, hai nang·pako do·o dokatbojok.

Sikimepa : - Nambebea ong·ode doke cha·chimboda.

Ma-detang: - Aiao! Namoba indinsa ong·aigen, kolej-o admission ka·e on·nan baoni tangkachi enia, sao dongate poraiatpagen.

Aminchi: - (B.Sc.-ni gnigipa gadango ku·mingengachim) Ang' baksa donge poraichina ine kobor on·nasa miksonge angade re·bajolachim.

Sikimepa: - Uchi dongani korosrangsai na·a, maidake cholipagen.

Aminchi: - (Rang·gitik mikkrono mikchian gap·e) Angni ma·apa angna inditan ka·saa enia angni nangnikaniko uamang mamung saloba jechakjava. Uni gimin pilakkon angon pakwataibo. (Mikchi singsolako u·site ong·katanga)

Uni re·angani ja·mano Aminchia maina skatang an·tangan aganeba grape re·anga uko ma·sipajae Sikimede nawang dake ma·detango sing·aha.

Ma-detang: - (Gisiko katchanigri baksa) Skango nang' dada baksa bia inditan melibeachim. Angade uamangko ripeng inesan chanchiachim indiba da·oa uni agana kattarangko knaani gita cheke niatoa maiba donuanikosa nikatna man·a. Sikime na·a bin baksan dongaibo, haida nang' dada nang·ko dakchakchina bio agane donangenggen. Unbaksana na·a bin baksa donga ong·ode nang' adatangkoba grongna man·aba gnang.

Sikime: - Indake ong·ode ade anga bin baksan dongainok.(ma·degipa mikchi u·site nokningchi napanga).

Sikime, ma·detangni agana gitan unbaksa dongna namnikbeen re·angaha. Da·o ua Aminchikon gisiktangode bochitang channe uni ge·etanirangko ra·aha enia uaba uko nosari channe ka·sabeen jakkalaha. Sikime Aminchini napenggipa apsan uian-mongbimao napaha indiba Disende salo bading chiwalaniko dakjoljolna man·a gita pringosa napsikaaha.

## CHAPBIDIL – 5

Ku-a gittal jakkalgiminrangni miksonganirang:

Uianmong: - College      Paski: - Master Ma-ski : - Madam  
 Wa-sosi : - June ja.      Rongsikra : - Result (Booklet).  
 Nolnapata : - Addmission      Kambite: - Result  
 Nian : - Exam

## CHAPBIDIL – 6

## “SALJATCHI ENIA BALIKIM”

Saljatchi enia Balikim chubegipa gadango dokkol an-nokni ningo kamko ka-enggipa mande saksani depanterang ong-achim. Saljatchi nokoni dal-batgipa depante ong-achim. Ua saksu denggugipa enia pagipani gamo asonge gangbo dake kangalrangko mikcheppipa mande ong-achim. Ua salantian chu ringe mandeskako doke antidamrango re-jojoe ripengskarang baksa pagipani kolre-ko saljojoe me-tra nomil saksu nikna man-gija rikjojoe skatang ramasamni achak koregita dake janggi tanggiparagonisa ong-achim. Uchi Balikimde bimingna krakra mande skana dongto-rotoe dakgipa, gisik ka-sin-gipa ong-skachim enia ua adatangni dakbewalrangko namen mitchibeachim. Uamangni ma-gipaba mande skana jaksramgipa, meli-nangrime enia pilakkon ku-atoe agangipa me-chikma ong-achim. Indiba pagipade gisikgrigipa gangbo dakgipa mandesa ong-skachim. Apsandake uni skanggipa depanteba ukon man-achim enia mikkang bimangba uade paan pasrak daka rika kam-cholon pilakon on-tisaba dingtanganian grichim. Ma-gipa enia uni jonggipa Saljatchiko nama bewalo mandeskagita ong-atpana skachim indiba pagipan iarangko namnikjachim, maina ua an-tangni bimungkon depanteni namgijachisa mingsingatna skachim. Iani a-selan ma-gipa enia Balikimde apsan nokdango donggenchimoba uamang paningsa baksade bisigrakgipa chipu baksa miknenggipa chuna gitachacha bobil ong-grikachim. Saljatchi pagipani namgija bewalna ka-saniko man-e gal charoroaha enia pagipa pangnan uana indakesa aganskarongachim: “ Man-e cha-gipa, rike donggipa mandeni dedrangde gimikan indaken dakaia. Bebegitaba dedrang namgijako

dakjaode maikai gipinrang uko angni depante ine ma·sinok? Angni tangka, rang·gam sana, pilakan dedrangnasan ong·a. Ang' chimonggimin gamo pangchake ang' dedrang gangbo dakna man·jawa ong·ode uamangni man·e cha·gipa nokdango atchiania mai namgni ong·sikanok?"

Saljatchi pagipani skatang dakna jakgitek wataniko man·e skatango janggi tangaha enia mikkangchi an·tangni janggi tanggni salrangnade on·tisaba chanchijaha. Chu ringtinge, nomil rodiltinge ku·minggija uidikoba chusokaniko man·jaha indiba Balikimde pagipaoni bikipilsranggipa bewalosa ong·e uni ka·saniko on·tisaba man·jaha. Uandake ong·genchimoba ua ma·gipani ka·saniko man·skae, songsar baksa meli·nangrime, mande skana jakkaltobegipa ong·e gisik ronggrikgipa pante ong·baaha. Da·o ua uidikmongni a·bimikko matchote B.A.-ni skanggipa gadango ku·mingengachim.

#### CHAPBIDIL – 6

Ku·a gital jakkalgiminrangni miksonganirang:

Kolre: - Gari      Enia : - Aro      Dokkol An·nok : - Government

#### CHAPBIDIL – 7

#### ***“BALIKIM ENIA SIKIMENI GRONGGRIKA”***

Pringwalni chakate mibijak songman chan·mane, au·miksue Sikime uidikmongchi re·na tariaha. Cha·man ringmane chapmong·sechit ra·na nangarangko dokrao sike ua skanggipa changna Aminchi baksa uidikmongona re·angaha. Unona sokeon ua saksan ong·e kratcha·a gnangsa uidikdringon asongengachim indiba dikdiksani ja·mano an·tang baksa am·pokmadokroo asonggipa me·tra saksako ripeng man·aha. Ua ripeng gitalni bimungkoa Kasinchi ine mingachim enia ua cholikalgipa nokdangoni gun gnangbegipa me·tra ong·achim. Salgipino Disen an·tangni tomtoma (motor·bike) gitalo Sikimeko uidikmongchina sal·e donbaha. Unsalon Balikim Sikimeko grongchengaha enia Kasinchiba Disenko nikchengaha. Balikim Sikimeko gronga intalan un daknanga bimangna chanchie gisiko so·sojengjeng ong·aha, enia ua uko

cholikalgipa nokdangonin ong-enggen ineba chanchiengachim. U  
salonian ua uidikmongchin uko grongnamangmangsa miksonge  
re-aiachim unbaksana salprako changsa ba changgni nikujaskald  
sandiakon dontongjaengachim.

Uni janggi tanganio ua darang gipin me-chikoba nitonikan  
dongkujachim enia me-chik ingipani gimin chanchie dikdiksa  
salja-kukoba re-atan dongkujachim. Indiba maibakai Sikimeni gun  
gnange nitoani un rong-brak gita rakbegipa ka-tongko jringjrongate  
mikjapsani gisepon grikgipa ka-san chimik pilataha. Darang uko  
ma-sigipa saksaba ia ong-aniko knae bebe ra-na man-piljawachim  
maina uko namnikgipa me-trarang ritcha batpilen bang-beoba uni  
gisiko ka-sa-mikchaa ingipani gimin chanchianin dongsrangjanina  
pilakba una ka-saaniko parakna pa-jachim. Balikim saks  
chol-lengleng dake chananggipa pante ong-achim, ua pangnan  
ja-kepko gan-e kkuatangko watbrange ramram dake janggi  
tanggipasa ong-achim. Ua an-tangko one ra-na sigipa ong-achim  
jechin uni chananganiko nitobee rikgimin nokko kragijagipa  
rongrangchi nonge nidikata gitachacha ong-ataha.

Balikim Sikimena an-tangni inditan ka-saako donuna gita  
jotton ka-bengachim indioba ka-saani dikdikprakni ja-kuantion  
nangnikanirang inditan ning-tubee nabaroroaha. Salsana salsa.  
walsana walsa, batroroe cha-nap tunapilgija gisikan kore itenga  
gitasa dakpilengahachim. Pring do-gisikako senge walkon bilsidok  
walchipenga gita enia seng-ahaoa salkon ja-kudokna nae nappila  
gitasa nikpilengjokchim. Indake pringsao ua chako chaktoja, dongo  
dongtoja, gisikora namnika paraknara kratcha dake so-sojengjeng  
ong-e cha-chakramo gokgoke dongengachim. Unomitingchacha  
nogipa Noche uona re-bae uko nikaaha.

Noche: -(suk ong-chakjae) Dada Balikimde mainaan da-ororode  
sudrodro dakenga,                      maiba suk ong-gijanirang dongama?

Balikim: -Mamungba gri indin, be-en suk ong-jaesa.

Noche: - Be-en suk ong-jaenga ong-ode maina babamaangna  
aganjaengjok? Anga aganenane.

Balikim: - Aganena nangjawa. anga da·sion sam ringatman·jok.

Noche: - Oh, anga ma·sijok. Na·ade da·aoro manderangko saenggipa sabisikosa man·engakone. Aiao ia sabiside name sanja ong·ode namna neng·asai. Nibo, dada, na·a uko donuna da·o ming ritchasa batpile kattarangko jakkalengjok indiba kakketgipa a·selkode donunaan man·jaenga. Indiba na·a kakketko parakna nangnika ong·ode uko da·o katta mingsanchin matchotatna man·genchim. Beben na·a ku·ranghide kakket daken aganenga indiba nang' bimangara tol·enga inesa mesokskaenga. Himm..... angni chanchiani gitade nang·kode Goerani namchiktangsa rimengakonde!

Balikim: - (ka·ding<sup>smite</sup>) De, ma·siaha ong·ode knatimsrangbo. Anga nang' agana gitan me·chik saksako namnikengachim indiba gipinko ka·a dongama dongjaenggenma enia dongja ong·oba angko namnikama namnikjawama. Uko chanchiesa angade gisik suk ong·brejaenga.

Noche: - Aiao, na·ara una maina indita chanchia, namnikode namnika, namnikjaode maikagen. na·aba pantesa uaba nomilsa. Uni gimin namnika ong·ode parakataibo maina ukoara saksan ra·bitkame an·tangko so·sojengjeng ong·atenga. Darang a·gilsakan parakgrikjaode jikse ong·griknan man·jawachimba. Uni gimin jeko sika dakataibo ra·chakjaode gipinko sanditaibo.

Balikim: - Bah, indakarangode na·an angnade ma·sibatpila dakake!

Noche: - Maiko dakgen a·gilsakon dongenga ong·ode a·gisakni giminde ma·sinan nangtelaia, ong·jaode maikai janggitangko ripinggen. Atcha, ua me·chikara iditan nitoama? Angni chanchia gitade nitochongmotnan nanga, ong·jaode maikai angni adatangni ka·tongko indake be·atgenchim.

Balikim: - Silako nitoakode agannan nangjajok! Angade a·gilsako indake nitoa donggen ine gisiktango chang·samangba chanchie nian dongkujachim enia indakako chagrongna mamung ka·dongsoaniba

grichim. Da-o maichi maidake uni silako angara nang-na agana man-gnok. Haida, Saljong Ta-sin me-chikan ukode sokchakujanaba donga!

Noche: -De, ong-aha, agandamna nangjawaha. Indiba na-ara bini bimungkode man-pajokma?

Balikim: - Bimungkoba man-kuja enia ua bano dongenga ukoba ma-sikuja indiba da-odipetde ang ka-tongon ong-kuenga.

Noche: - Indake ong-ode na-ara da-ororoni pante gita knirangko rate, ganding-chindingrangko chi-ronge gane apani kolreko sale balangboda. Unode na-a namnikatangko paraknan nangjawaha, bian nang-na skang tap dakbaignok.

Balikim: - Aiao, man-jawa nono, anga jedaken da-o uagitan pangan on-gchina silako nangnikgipa silgipachi re-angchina enia jean angko nangnika ua angona re-baaigen. Anga da-o jakpatango gadonan rakkuja, apani gamo ga-chake un gamchi ka-saako breode knalo angna maidakgipa salja-ku sokbagen, ukoba chanchisona nanggen. Sina nango jikgrian sisrangaigen indiba indake daknade man-jawa ka-sapae.

Noche: - Na-ara ku-akon dal-dalesa agansimaiade! A-gilsako janggi tangna sikode gipinrang jedakenga ugitan dakpabo, ong-jaode na-ade gimik-on ja-manchakrikgnok.

Balikim: - Gipin jegitaba dakchina indiba angade angan ong-aichina.

Noche: - Indake ong-ode na-asa, indiba duk man-a dake mesokdamnabea. Angade re-angengjok.(ong-katangna daka).

Balikim: - Aiao, adatangkon ka-a nangsrangengjokma? De, dikdiksa sengkubo. Na-a enia ua indakako nangnikode na-simangni nangnikako chusokatna anga iako dakgen.

Noche: - Oh, mingsa da-oba na-ade marnung idea-an dongtaijawaha. Na-a knalo seng-gnangkale kolej-chi re-ange bini re-baengmitingo



nikja dake chatinggrika dakbo. Indakemung kitaprangko kolata dake un' bimungko nijolbo enia golponaba cholko ra'bo, indiba sadikpile chapretgrikode namsrangtaijawahane, unaba simsakbo.

Balikim: - (Sko narongrenge) Indiba biara sakoba ka'a dongenggenkonsai na'a, unaba kene nikatenga.

Noche: - De, ka'a dongoba namnika ong·ode uko wat·e nang·ko ka·aigenba.

Balikim: - Angade an·tang ka·sabeoba gipinni ka·sa namnikako ra·seknade sikjachsai.

Noche: - Ka'a donggijako man·a sikode gandil chotkugijagipa bi·sako sandie ja·kilding kae kange donebo.(Chakate re·anga).

Balikim nogipani agana gitan antichi re·ange kniko nitobee rat·e namkala ganding chindingko chijengbitbit ganne, mikkang nikpile ja·kopko an·gitalate uianmongchi re·angaha. Aiao, da·oa biade saliramni an·gil gipok saksa gitasajok! Sawa ban' nomilsa jerara·e katkuna banoni nokma depante inesa darang ma·trani ka·tongan gropgrap inpile bnekainok. Beanbebe nikrikgipa me·tra sakprakan, mikgil rep·reptokaengjok, jaksi pe·ropropesa ku·chil chikspite nikuaktokaengjok.

Balikim Nocheni agangipa ku·arangna chanchie saksan gisiktango ka·dingjoljole re·angoa, Sikime baksa chapretgrikman·bebeaha indiba un' gisiko indake daknade on·tisaba chanchisoanirang grisrangchim.

Balikim: - Oh dukni kemane.

Sikime: - (ka·a nanga gnang) Na·ara mikkron kanama?

Balikim: - Kanade ong·jachim indiba.....(gam·bregija) nang·na chanchiesa ka·tong kana ong·aha.

Sikime an·tang chapmongrangko koldoe, uko nidoon un' chanangako nike gisiko kratcha·an gape, mainan indake aganmanjok ine chanchie uoni an·pildate katangaha. Uni rang·gitik mamungkoba janapgija an·pildate kania Balikumni ka·tongkosa ka·san wariona sikipakatagita dakskaaha. Ua a·sel ong·anichi uni gisikko skangona bate da·o suk ong·atbatjaha indake ua uianmongni palchakrachi re·ange chanchie nibeoba mamung cholkon nikteljaha. Una indaka salja·ku ong·engmitingo Sikimea adita panterang baksa apalo ku·sree ka·dinge roengachim enia uaranga uni gisikona bate bate ong·gija dake chanchianirangko ong·katataha. Uni gisikode inditan una kenchakatengachim, enia ua panterangko mikbu·gipa mikkrongrangchi mikchidingding niatengachim. Sikimena saoba an·tangna bate ka·sabatgipa me·asarang donggengchimode una ua wat·e on·aba man·aigengchim indiba ong·rongenga gita kragija kamrangko dake segri ma·gipa ong·ate galanikode ua nikna sikjawachim. Balikim an·tangni una ka·saanikosan ning·tubate enia kakket ong·e nikengachim indiba uan a·gilsakni ramram dake chanchianirangsan ong·aiachim, maina darangon ka·tong gnang enia ka·sani gisikba dongachim.

Balikim an·tangni gisiko indakeba chanchiengachim, “Bina anga indakpile ka·sagengchimoba angora mamungan·gri. Ja·mano jikse ong·grikna nange nokdang·ba·ku dakan salo bina ku·siniko on·a man·jaode, oh, nang·ni angna inditan ning·tubee ka·saanira ianchima, ine sing·ode angara maiko maidake aganchakpagen!” Uni indake iarangko jada sike chanchibengmitingo ua Sikimeni pante saksamung gisik nange ku·sreengako nikataie gisiko chaktonikteljaha. Bon·kamao jedakoba gisikan suk ong·teljaengani gimin sebichit kingsako palchakrao sesrangaha enia uona re·ange uko on·eha:

Sikime: - Iara maia?

Balikim: - Angni chitti.(an·pile re·anga).

Sikime an·tangni ripengskarangna kratcha·e enia ong·gimin a·selrana aiao inmane gisiktango chanchina man·piliae noktangchina joljol re·angaiaha.

**SEATGIMIN SEBICHIT:**

Ka·sara ripeng,

Kan·dikgipa kattarangchi seatengon gualgija ka·sachi salam.  
Dongja nanga kattade ka·sa nang·na parakna indioba sing·atchengna  
sika gisik jajrengchake, namengama na·ara, janggin' biginchiara.

Ka·sa, ango nang·na agre, dongja gipin miknapa, ian angni  
skanggipa enia na·a namnika ong·ode ong·china bon·kamgipa.  
Indioba nang' ka·tongo sakgipinni ka·sako nokchakenga ong·ode,  
nang·ni ka·sinbegipa enia rinokbalbal daggipa gisikchi chanchie  
kema ka·pachina ang' jaksamgni jakrangko chopjole mol·mola.

Anga nang' bimungko enia dongchakram biapko ma·sija  
indioba ang' ka·tongo ka·san suakpilanichi gisiko draataniko man·e  
ia ka·tongni gamchatagrigipa ka·san lekkani bichitsao ka·saniko  
parakatenga. Na·a nangnika ong·ode ian angni ka·tongko nang·nan  
on·atenga, enia iako gamchatnike ra·chakpabo. Haida mikkangchi  
janggi tangkugni salrango jakkatobegipa ong·naba donga.

Seanio gualanirang dongode kema ka·pabo enia  
ka·saniko ra·chakna  
man·pajagenoba gipinrangna parake angna kratcha·aniko  
ra·bapajachina mitela baksa mol·mola.

Sechakataniko nisamsoenggipa  
BALIKIM.

**CHAPBIDIL – 7**

Ku·a gital jakkalgiminrangni miksonganirang:

Palchakra : - canteen/dokan  
Gianing : - Budi/Idea

Ja·kep : - Chappal, Sandal  
Tomtoma : - Motor-bike.

---

**CHAPBIDIL- 8.**  
**“SIKIME RIPENG TANGKO GIMAATA”**

Sikime Balikimni seata sebichitko man·soe maiko dako namgen chanchion chanchisokjae Disenona re·angaha. Disen chiringsamo saksan asonge dokslitingko doke rosoengachim.

Sikime: - Disenara ianosama, angade nokchikosa re·ange sandia dakepajok.

Disen: - Oh, na·ara bachinisa, maiba nanga kamrang dongachima?

Sikime: - Janggi tangkugni salna dal·begipa chanchina nangenggipa kamko bakrime chanchigrike nina inesa re·baengachim.

Disen: - Maidagipa dal·begipa kam dongjok da·ora?

Sikime: - Angna Balikim minggipa chitti seatawai na·a , mejalo Kasinchio tale sing·e nioara man·e cha·kalgipa nokdangonisana enia mandeba gipinrang gita asika dakpagipade ong·jana.

Disen: - (Rang·gitik gisik dingtange, mikkrono mikchi jingjang jingjang dake gipinchiko nie) Na·a ka·tong enia be·entangni nokgipa an·tangna jekoba chanchibo. Angade indakgiparangni giminde maiko aganpagen.

Sikime: - Aiao! Na·aba indina dakaiamo, skangode na·anba angni dukba nang·ni duk enia nang·ni sukba angni suk ine aganachimba. Da·oba maibakai angna ja·mano duknirang sokbaode na·ara ang' dukko nie dongna man·pagenma?

Disen: - ( Skoko narongreange, mikchi u·site mamungkoba agangija chakate re·anga).

Sikime: - (Mamungkoba ma·sipajae nawang dake uko ja·rike) Oh! Kemane nang·na mai dukni donga angnaba aganpaboda.

Disen: - Ka·sapae da·almangmangkode angko saksan watpakubo.

Sikime: - (Gisiko duk man'a gnan) De, indake ong·ode angaba re·angainok.

Attamchibara pilitaie Sikime Disenona re·baaha maina uni gisikoba inditan melibegipa ripengni dukko nike ka·tongan rakpiljaengachim enia ua dukni ja·pangko sandie una ka·dimeataniko on·panamangba a·selko sing·nan pa·manjaengachim. Ian uni unbaksa ripeng ong·chengaoni skanggipa changna Disenni dukko nikchengani ong·achim, maina uni mikkango gimik dakgipa a·selon ka·dingsmitani enia katchanikosa nikrongna man·aiachim.

Sikime: - Disen, oh, Disen. Dongama, dongja?

Disen: - (Tusiaoni mikjrao dake) Maina, sawachim?

Sikime: - Anga Sikimesa, ma na·ara angni ku·rangkomangmangba gualsrangjokma?

Disen: - Oh, Sikimesa, angaba nang' ku·ranggitan knaade knaengachim. Re·babo nap·e asongebeda.

Sikime: - Angade da·oba re·banade pa·manjaengachim indiba gisik suk ong·teljaesa re·drabajok.

Disen: - (Sikimeni mikkrono mikchi ran·krapani chinko nike) Ah! Na·ara mainasa grapskajok. Angade da·siode nang·na kusi ong·chakan amchakpiljaesa mikchi ong·katpiljok enia grapatangna kratcha·esa nang·ko re·angchina ge·etachimba. Anga nang' agana gitan nang·ni gimin da·sio chanchibejok, na·a an·tangan namnika ong·ode ka·saaniko ra·chakaibo indiba poraianikosa jedakeba gualpanabe.

Sikime: - (Dukko donue ka·dingsmite) Him! Angade nang·ni an·tangni maiba dal·bea duknian dongakon ine chanchiesa da·alde kolej·chiba re·angpilgija salgimik grapbejok.

Disen: - Aiao! Na·ara angna indakpilesa jajrengchakama? Knalode na·songde monthly test donganakonde, re·ange poraiebojok enia angaba poraina nanggen.

Sikime: - De indakode re·ainok, name poraibo indiba angade porainan aratasai na·a. Oh! Disen, angade gualengachim, nang·koba Kasinchi namnikengachimnawai, na·aba bi·ko namnikpagenchima?

Disen: - (Ka·dingsmite) Mande maikai mande skakoa jegalpanoksai danang, indiba ka·tonggri gisichisan mangmang ong·aigen.

Sikime: - Indide na·a unbaksa ka·sa·mikchagrikna man·jawama?

Disen: - (Skoko gakgue oe, ine aganchaka).

Sikime: - Oh! Angade nang·ko binade man·telen on·aigen ine ku·rachake re·bamanjokchim indiba da·oa indinsa ong·ainokon.

Disen: - Nibo Sikime, na·a pilak kamnan ku·rachake ra·nabe indiba jotton ka·e ninasa mangsonge ra·chakbo. Enia na·a maikai angosing·chenggija iako dakaljok!

Sikime: - Anga nang·o inditan ka·dongna man·a enia angni agananikode jekoba ra·chakna man·aigenkon ine nang·koa chanchiachim.

Disen: - Oe, angaba a·bachengode indaken mangsongengachim indiba da·oa anga an·tangan an·tango ka·donganiko jaktuatsrangjok.

Sikime: - Chang·samangmangba na·ara iani gimin chanchie nitaina man·jawahama?

Disen: - Ka·sabea Sikime, na·a da·o re·ange chi gnang me·dikko ra·e wal·kosak su·untio gat·e, uno chapat enia chinini palo kariko pu·sikae ringe nibo. Unon na·a ma·sigen, ua nang·na baditanakingking su·uaniko on·gen ba gimaatgimin chinini gunko

maikai mesokgen enia uachin na'a angni pilak mangsonganirangko  
altubeen ma'sina gita man'aigen.

Sikime: - Iano na'a maiko mangsonge aganaha, angade on'tisaba  
ma'sija.

Disen: - (Sko narongrenge) Na'a da'o uko ma'sie ra'na agre  
chondugakuenga. Ja'mano gisik bigreng rakahao pilakon ka'sne  
ka'sne ma'sigen. De, re'angbojok wal an'dalna siengaha.

Sikime: - De, indakode, walnamne. (nokchi re'anga).

Salgipino uianmongchi re'na skang Sikime Disenona  
re·bahachim indioba ua pilak an·tangni jakkalanirangko ra·e sebichit  
kingsakomangmang done ua nokko wat·e re·angaha.

### **SEBICHITO SEGIMIN KATTARANG:**

Ka·sabea Sikime,

Anga nang·na ku·rangchi iako aganpanara ang' ka·tongan  
rakjanaba donga. Ru·utbea salrangonin anga nang' baksa ong·aha  
enia nang·ko an·tangoni chel·e donjaha. Indioba da·alo pilak angni  
kam chusokaha, maina nang·ko ka·tong gimikchi nangnikgipa  
dongaha. Na'a angna duk man·nabe, na·aba ma·sia ia a·gilsako  
mandede songre·enggipa gitasan, basako sawa sako wat·e  
re·anggen darangba ma·sisoja. Uandake angaba da·alo nang·oni  
chel·beachi re·angengaha enia rasong gngangode salsao grongtaigen.

Nang·ni adatang nang·ko nisoचना agane donangani  
giminsan anga pilakon dakaha enia iana na'a angko mitelnabe indiba  
nang·ko rasong gngangbee dakahani gimin Sakni Gitelkosan mitelbo.

Nang·ni salgnini ripeng,  
DISEN

Sikime ia uni seanggimin sebichitko ku·minge gisiktango duk man·bee saksan kikkikari grapbeaha. Unsalo ua uianmongchi re·angpilgija uko banoba saobarangde nikrikengnaba donga enia saoba saoba saksarangnade bachi re·angenga uko agane donangengnaba donga ine sandina mangsonge uoni re·ongkatangaha. Uni indake ka·suang-mikchijingjang dake ripengtang Disenko sandibengmitingo ua matdon-ni sepango Balikimko grongaha. Ua gisiktango sanibani giminsa chanchie sakobasa nikna sike sandiengmitingo rang·gtik uko nikdate dil·dik ong·e re·na deda, sing·na jaja dake a·achiko nikome re·badiangna siengachim. Balikim an·tangni inditan una ka·sabeako donchana man·jae uni saksanako chol ra·e, kratcha·begenchimoba mikgilweko donue gam·bregija, “bachinasa saksan” ine sing·aha. Sikime uni kratcha·dugae kattako rongtalbregija ka·sne aganakoa, “salgninasan sengaigen” ina gita knasrete gisiko ding·chaoa gnanng nawang dake rang·data gnanng, “maidakane” ine sing·sikaaha. Balikim an·tangni aganako knajae uni rakdata gnanng sing·aniko knae nachilba name knabrejakon ine chanchie, “Bachinasa saksan inesa” ine rakprete aganchakskataiaha. Sikime uni gam·bee agananina enia an·tangni ong·gija dake knasretanina kratcha·a gnanng ka·dingsmite, “angade angni ripengtang Disenkosa sandienga” ine aganchakaha. Balikim an·tangni sing·anina uni aganchakani ja·mano gipin mamung kattakoba bikotdape golpo ka·angkuna cholkon nikjae, “De na·a sandiangbo. Angade uchi re·kuna,” ine mikkangchiko jaksi ot·e jechina mikkangachim uchinjoljol re·angaha, maina ka·sa·namnikgrikani kattarangko golpo ka·e rona inoba unsalonakingkingan Sikime uni sebichitna mamung aganchakaniko on·pilkujachim. Sikime, gisik rongjiribee sandibeoba ripengtang Disenko nikna ka·donga grie, neng·a namatna ine salre·atramchina re·ange dikdiksana uno asonge neng·takeaha.

Balikim, Sikimeko done re·baani ja·mano an·tangan gisik rosiksake uko gronggipa biapona re·bapile uko nieahachim, indioba uano ua sakgipin manderangni re·wilwatana agre mangsongatangkode niketaina man·jaha. Gisiktango ka·saako ra·bite, ka·tongtango gam·bee an·chi sutimtimako chakna am·jae, samtangtangchiko re·roroe sandioa, rasong gnanngbee ua Sikimeko



salre·atramo saksan asonge roengako nikataha. Balikim adita cha·anirangko ra·e Sikimeni saksan asongenggipa biapona re·angaha. Indioba ua uanona joljol re·ange una ku·rang on·jole unbaksa asongpae golpo ka·enade pa·jae uni asongenggipa mikkangko nikja dake re·pakanga dakaha. Unomiting Sikime uko nikrikoba, gisiktangon mainibani giminsa ning·tubate chanchibengani gimin unade mamung simsakan griengachim, enia Balikimde uchi an·tangko nikrikeba, uni ku·rang on·rikjani gimin gisiktango duk ong·skabengachim. Adita uni chel·kale re·angani ja·manosa rang·gitik gisik pangsang dake, “Da·siode Balikimko iachi re·baenga gita niksoachim,” ine chanchie niwilwale niatoa, Balikimde uoni chel·kala biaposa saksan maikoba mikgepjoljole mikkronko mikjap mikjap dake asonge roengachim. Darang a·gilsakni mandean uni asongani enia daka rikani bewalko nikaten chel·aonin uko duk man·benga ine ma·siatna man·genchim. Sikime, Balikimna parakujaoba an·tangan una ka·saengani gimin uko saksan duk man·ate un’ ka·tongko ching·chaoenggipa wal·kolo dondamna man·jae, an·tangan uni sepangona re·ange unbaksa asonge golpo ka·draeaha. Enia pilak an·tangna ong·gimin a·selrangko una aganjoljole ka·sne, ka·sne ka·sa·namnikgrikani kattarangonaba sokroroangaha.

Ua a·sel ong·anichin uamang an·tangtangni nangnikgrikaniko kratcha·ani grian parakgrikna chol ong·aha enia unsalonin uamang pangkimgipa ka·san’ nokko rikna a·bachengaha.

## CHAPBIDIL – 8

Ku·a gital jakkalgiminrangni miksonganirang.

Doksliting : - Guiter  
Salre·atram : - Park.

Matdon : - Chirua khana/Zoo

**“DISENNI BILGRIKKO SKANGGIPA GRONGA”**

Sikimeko wat·e re·baan ja·mano Disen sikdikdik saksan ramasamo asonge guama bitchiko ringjoljole maikoba gisiktango ning·tubee chanchibengachim, unon rang·gitik ua kore gita chacha ong·enggipa pante saksako nikataha. Ua pantea an·tangni chapmongrangko ka·o nange gobrangengachim enia aditani ja·mano an·tangan uarangko koldoe ka·siksike grapengachim. Disen ua mandeko nike ka·dingnaba sika, dukba manchaka enia pilsara kore ita man·manchaasakon ineba kenman·pilengachim. Indiba ua maidakgipa mande ong·manchaa uko ma·sina sike uni sepangchi re·ange uo singeaha:

Disen: - Oh, ripeng nang·na maiba dukni ba gisiko suk ong·gijanirang dongama?

Agital Pante : - Nang·chi mai nanga, na·a mamungkoba ma·sija. Namna sikode ramatangko mikjetjet nie re·angbo.

Disen : - (ka·dingsmite) Oh Sir, kema ka·pabo. Angade bilgrisa na·ara Boxer Champion-sakon .

Agital Pante: - (Mikkron gitchake nidoe) Na·ara ra·asa ra·biengama?

Disen : - Nibo ripeng, angade nangni saksan gisik suk ong·jaenganasa .

Agital pante : - Kema ka·bo ripeng, angade gisik suk ong·jaramramsa nang·ko indake aganmanaha.

Disen : - Mamungba ong·ja, angaba an·tang gisik suk ong·jaode indaken dakmanaiawai. Ripeng, nang·ko sing·tekagita, angkode Disen ine minga enia nang·kora mai mingachimsaimo?

Agital Pante : - Nang·ko gronge anga namen katchabea, angni bimungkode Bilgrik ine minga.

Disen : - Oh, ripeng Bilgrik, da·sio na·ara maina chapmongrangkode gobrange enia uarangko koldopile grapengachim?

Bilgrik : - Maiko agangen ripeng, kangalrangni kamkode kangalransan ma·sipaaia. Anga saksa me·chikna inditan ka·sabeachim indiba da·o bilsignini ja·mano motor-bike donggipa pante saksako nike angkode gelangjok. Da·oa angade an·tangni rasonggri ka·tongko rim·tome una chanchiana agrede mamungan griaha.

Disen : - Ah! Na·ara unamangmangan an·tangni poraiani kitaprangko gobrangskaengama?

Na·a angni gimin knae nichengbo. Anga saksa me·chikna ka·sabeachim, jean salsao angni jik ong·na miksongsoenggipa ine chittio janape angna ka·donganiko on·ahachim, enia uan angni janggi tanganio skanggipa namnikchenggipa ong·achim. Angna ua bilsu bonganakingking ka·saa dakmike rang·gitik angko a·sako saksan wat·gale jringjrotni nokona re·angaha, indiba na·a uko siaha ine chanchinabe, ua sikuja indake ong·oba piltai angona an·piltaijawaha enia re·bapiloba angan nokchakjawaha. Piltai anga uni ja·mano sakgipin me·chikna namnikatangko paraktaiahachim, jenan an·tangni janggikoba on·chakna man·genchim. Anga an·tangkon unasan enia ukoba angnasan atchiataha gita chanchiman·pilachim enia angni janggian uni bimangosan pangchake rang·sitenga gita nikman·pilengachim. Indiba uni aganchakania, "TOOLATE" inesan ong·achim. Uandake angni janggi tanga gimikan pilak kamon ja·manchakdugaenga. Angni atchianiba enia poraianioba apsandake ong·enga maina anga an·tangan ja·manchakdugagipa rasongni gunkosa be·en gimikon kruataniko man·ahachim. Unigimin anga ia a·gilsako ka·sa namnikgrikaniko kusinasan daktokeng gita nikaha enia unan indonga salo duk man·a ken·e pilakon ka·samitingode an·tangni ine kangagrisa ka·sana mangsongsrangaha.

Bilgrik : - Maidake na·ara an·tangko atchianio ja·manchakdugaa ine aganenga. Nang·ni miksonganiara na·an nokoni chonbatgipama? Enia chon·bata ong·misikana na·a maikai uachiara mairango

chusokjaha, ma nang' pagipa siahama?

Disen: - (Mikchi ripake) Beben angni ma·gipa siaha enia angnade pagipaba siaha maina angade pangnan an·tangoni che·e re·anggiminkode siaha inesan chanaia. Apade siade sikujachim indiba angko amani oko donmittingon biara angni adatang sakgniko rime katangjokna enia anga uamangko da·alona kingkingba grongkuja. Angni ma·gipara angko an·pakani ja·mano bilsu gittam ong·on simanjok. Enia ia angni ja·manchakdugae atchiachi anga a·sako katchaaniko bon·pilen gimaatsrangjok!

Bilgrik: - Oh, mairongpilgipa pagipa. Angade an·tangni kangale atchiakon gualpilengjokchim enia motor-bike ra·e on·jaanan kolejchi re·jana am·engjokchim. Da·nang apaba baoni tangkachi!

Disen: - Hao, batpiljok! Me·chik saksani kusina an·tangni ma·apa enia jonggipa nogipani bikmako dokpruna am·enga? Oh, indakesa da·ororoni manderangara motor-bike sale nomil balkorekna mangsongesa ma·apako indake sko dingattokenga. Na·a da·o mande salgitan ma·sikuenga ong·ode chanchie nibo, darangni ma·apaan an·tangtangni bilgri jakgrijoko nogipa jonggipana enia an·tangtangna ku·sa rongsa man·paako suale ra·rone cha·pachina inesa detangtangko poraiatenga. Nang·ni ma·apade nang·kon jakma cha·pana ka·dongsoengani gimin jedakeba sro snameba. mikgilpaleba nang·ni dabiako man·e on·a jottonde ka·pagen maina dedrangni dukde uamangni gisik ka·tongosa skanggipa nangdikechenggenchim. Indioba uana ia cholko ra·e uamangko indake nangai nangjai bilni nalsaoniko dabie sko dingatode maikai nang·ko gisik gnanggipa mande ine chankugen. Na·a atchiaonin da·alonakingking Isolni on·gimin ja·achi re·e indita ru·utbea bilsirangko re·atenba da·o salgnimangmangni salko ja·atangchi re·kuna neng·nikengama? Nibo, ripeng nokdang ine aganon ma·apasan uko rikja, indiba tom·tomaniko nokdangona ra·banade dedrangni jakosan ong·a.

Bilgrik: - (Ning·tue chanchia gnang) Oe, beben nang' agana kakket ong·a ripeng. Anga skangonin nang·gita dakgipa ripengko grongodechim.

Disen : - Indakede ong·ja ripeng, Isolde pilaknan apsan gisikon patiaha ukode mande sakantian ma·sia indiba namako chanchina sika·jaani giminsan ong·aia. De, jeba ong·china da·ode nang·ni neng·nikaniona re·baskanaha. Ua nang·ni agangipa me·chikara sawachim. Uni photo·rang donga ong·ode angna mesoke niboching.

Bilgrik: - Chel·begipa biapona wat·e re·anggimin mandeni photokosa ra·bitna nanga indiba biade da·omangba angni ka·tongni album·on dongkuenga. Uni giminan photokode ra·bita dongja indiba bimungkode agana man·aigen, bini bimungkode Kasinchi minga.

Disen: - (ka·dingsmite) Basako na·ara bini ka·satang gitalmung motor·bikeo re·angakora nikriksajok.

Bilgrik: - Da·siomangmang bang·e ru·utkuja.

Disen: - Angni chola·bara baksa apsangipa rongnikon ua me·asara gannachina nam·e niboching.

Bilgrik: - (Name nie) Oe apsan, indakgipa rongnikon ganna. Ma, na·aba uko nikrikama?

Disen : - Uara anganchimba indiba angade uni mikchatangde ong·pajane. Na·asa saksan skatang chanchie an·tangko duk man·atenga. Enia angni chanchianigitade na·song sakgnini gisepo maiba dal·bea ma·sisretgrikanirang dongakon.

Bilgrik: - Haida, angade ukode ma·sija, indioba adita salrangna skang angni ripeng Jangrik uko gipin me·asako ka·enga ine aganachim, una gisik suk ong·chipjae angara bina rakkala kattarangko janape chittio seataha.

Disen: - Aiao, na·aba me·chik suri dake ukon bebe ra·aijokma? Saoba bol pangsa·ko mojekjeke balwa rakkenga ine tol·akomangba na·ara bebe ra·aigenchimde mo. Maidakgipa kattarangchi na·ara seatachim, mingsakomang gisik ra·atengkuama?

Bilgrik : - Gimikkode gisik ra·jaengaha indiba mongsongbatgipa kattade indake ong·achim, “Angni ja·a jakko enia skoko dokprete donanggipa mandekon anga kema ka·na man·kugen indiba ka·tong dok·prugipakode atchia changsnioba kema ka·na man·jawane”.

Disen: - Bah! Kattakode ga·sukalen man·jokchim, indiba na·ade uchin an·tangni ka·tongkosa indinari dok·pruaijok. Gisik rakbo ripeng, kiro siggimin bolko supe·e uni ritimtaiako kiro sikatpilnade ru·utbea salja·kuko nanggnok !

Bilgrik: - Oemo, kakketko aganachima, mikbuesa tolachima, angaba mamungkon sandichenggija dakman·aijok.

Disen: - Nang·na agangipa Jangrik minggipako nikodechim, anga kam·tek kam·tek mikkangon saepetpetgenchim.

Jangrik : - (Bachiniba niksrappilgija nabae) Mai daktokenga Bilgrik?

Bilgrik: - Oh, roaengjok. Disen, ianba angna agangipara. Bikon Jangrik mingaba.

Disen: - Nang·kon Jangrik mingama? Na·a Kasinchini mikchagipa pante gitalkoma·siamas?

Jangrik: - Im, mandekode ma·siaba, indiba bimungkosa man·ja.

Disen: - Indiba mande maidakgipa enia badia jolo donggipa ukode ma·siengnaba dongakon.

Jangrik: - (jaja jiji dake) Mandekode maidake agangen nang·gita anggitan dakaia.

Disen: - (ka·dingsmite) Oe, beben me·asa ingipade a·gilsakode nang·gita anggita dakana agrede gipin dakade dongja. Indioba changroa, chakan·dika, sakgisim, sakgitchak ba sakchigrik dakarangchide dingtanggrikani dongachimba.

Jangrik: - Maidakana ukoara tale tale sing-enga. Angara bini mikchagipani dictionary-ma? Ma, angko tole agangipa gita nikama?

Disen: - Nang·ko tol·e agangipa inede agankujachim indiba na·an an·tangko tol·gipa ine parakahanina mitela. Beben, na·a kattachi an·tangko kakket ine mesokenga indiba nang·ni mikkang himangrangan tol·a ine sakkiko on·enga. Uni gimin nang·gita dakgipa mandeko a·sako atchiatjaoba namachim. Na·ade pangnan na·chikol samsako saksachi enia samgipinko sakgipinchi dake uamangni aganako ra·e tol·jujae on·rongenggen, indiba indake dakaniara mandeni nama bewalko mesokani ong·ja.

Jangrik: - (Kratcha·a gnang) Ripeng Bilgrik, anga nang·na mamung namgijakoba dakkujachim. Anga nang·ko Kasinchina inditan ka·saenga inen ma·sia. Uni giminan nang·ko una kranikjaesa indake tol·ahachim maina biara nang·oni dingtang enia na·aba bioni bilong·en dingtangsrangachim. Haida na·aba ja·mano bini kamcholonko ma·siahaode an·tangan skimpilnaba donga, enia Kasinchinaba pilsara jajrengchake nikata. Maibakai na·a ja·mano bini dakbewalrangko ma·sie biko wat·na nangode, mejaogita biade duk chakna am·jae sambisi ringe sinasiahachim. Uaranko nikesa nang·naba enia binaba chelchakani gita ong·gen inesa uko dakahachim. Iano angni gualani donga ine nikode kema ka·paiboha.

Disen: - Silni basing baioba a·oni gita ka·sinja, enia a·ani basing chiko ka·sinate ringtoaniko on·oba ua silnigitade baija. Jeko je namnike seokahachim uan una chuongbeahachim.

Bilgrik: - Kasinchina da·o angni ka·saengmitingo na·a uko bilonggipasa ine aganenga enia sakgipina ka·saskagenchimode ukoba saobade apsan nang' agana gitan agantaigen. Indake ong·ode sawasa nama sawasa namja enia angara sa·ko am·e ka·saskabo.

Jangrik: - Oe, chong·mot indaken ong·aia. Darangan an·tangtangkosan nambatnike nikaia. Ripeng na·a Kasinchina

indakpilesa ka-sa-nga ong-ode jedakeba : ngan jotton ka-e nang-na  
man-piltaie on-aigen.

Disen: - Ripeng Jangrik, chingni ma-sisrete nang-ko gisiko  
saatbeahana kema ka-bo.

Indiba katta iasau, do-osa a-gilsako changgni atchia mandede  
chang-sana agrede atchitaitaijane.

Bilgrik: - Maina na-ara ka donganiko on-ani palo batesa angnara  
jajrengniko aganenga?

Disen: - Bilgrik, na-a bi-sara ong-jajokchin ba, bi-sarangnasa ma-apa  
an-tangtangko ja rikna kene antichi re-ango kukut ra-bagen ine  
tol-e ka-donganiko on-e donangrongna nangaba.

Jangrik: - Gipinni kattako ra-e kam ka-aniara gima-ani ong-a ine  
skango na-a poraie nikujama? Maina na-ara bini agannako ra-e  
chanchie an-tang-ko sko ding-atenga.

Bilgrik : - Kanask a kanako dilna man-ja ine ma-sieba an-tangan  
an-tangko kana ine nike, kanaskao dakchakaniko nangnike  
mikkron nikgipani dakchakna am-engako je-chakode janggi  
tangbangjawane,

Jangrik: - Oh, na-ara baleke roakon bebe ra-e maikosa indake  
aganskaengjokai.

Disen: - Ripeng na-a gisiko sapanabe, na-a baleknasa namnikbatode  
nang-ni janggini salde indaken bon-angaignok enia na-a uachi  
mamung nam-gnikoba man-dapjawa batesa maiba gamchata  
man-gnina sesogimin nang-ni janggini rasongkosa gima-atpilnaba  
donga. Nangni agana gita gipinni kattako ra-e kam ka-aniara  
gimaani ong-chongmota Da-o na-a Bilgrikkon nikman-aha indiba  
haida na-a an-tangni chanchia gita daks-agenchimode ua nang-ni  
chanchianiara nang-ko siani a-kolonasa jakkindile ra-angskanaba  
gnang. Jekon agansrangode a-gilsakni mandede pilakon  
chusoksranggipale ong-na man-ja. Uni gimin gipin aganako mitam  
enia an-tang' chanchiako mitam ra-e uko dondimesa pilakon dakna



nanga. Unbaksana chusokgipa mande ong-na sikode skanggipa gisiktangko mat-srame rakkina nanga. Jeko na-a dakna mangsongaha ukode chusokattelnan nanga, ong-jaode ua nang-ni chang-sa chusokgijanichian na-a an-tangan an-tangko gima-atskanck enia uachin na-a pangnaba pilak nang-ni kamrango chusokgipa ong-na gita man-chipjawaha.

Jangrik : - Mingsa miksonganiko pe-aniara an-tangan'an-tango ka-donganiko gimaatani ong-a ine na-a aganenga. Indiba ua nang-ni miksonganiera nang-ko dukni wariona dilgalanisan ong-skagenchimode na-ara maidaskagenchim?

Disen: - Oh, na-a ianigimin ma-sisokujaenga. Nibo ripeng, mandeni miksongani mamung saloba uni chanchiani apalona badie re-angjawa . Na-a an-tangan maini gimin miksongenga ukode miksongani bimangko dakna skangan ki-sang mikkang chanchie ra-chengna nanggen. Pilak kamko miksonge dakna skangba na-a uni bon-kame bite nangaonakingking chanchie ra-chengbo enia nam-gipa a-selona ra-ange chanchina skang siani a-kolona an-tangko galone don-echengbo. Ua siani a-koloniko an-tangko jokatna cholko sandie ra-an ja-manosa re-ani rama dilprakprakko gisiko segate donbo. Uni ja-manosa pilakon kang-kare ka-e miksongako chusokatbo. Ua nang-ni miksonganiko dakengmittingo an-tangni donsogimin ramaoni srete ja-kuko de-nabe enia gipinna ka-sachake re-atang ramako gele ba tarake chusokatna sike gipin seng-sotbatkala ramako basie re-nabe, maina ua pilakan majoani enia nang-ko ra-onanisan ong-aigen!

Bilgrik: - Aiao! Disen, sawa a-gilsakni mandea iako dakna am-gen?

Disen: - Am-jawa inc nikode miksonganiko pilakan dakjachina enia miksongatangko gipinrangna parake, chusokatna man-jahao an-tangna ong-siataniko ra-bajachina. Jensalo mande an-tangna ong-siataniko ra-bagen unon pilak uni janggina chanchisamsoanirangba bangbangoni ga-akongipa stilrangni chi pile a-o sengsipe gima-a gitachacha mikjapsaon ma-bonataniko man-aignok.

Jangrik: - Ripeng, Disen, na·ara inditan chanchininggipa mande ong·a enia ia chanchiani gimin chanchiskaon angade mamungkon chanchisokja. Ia gisikni chanchianiara baoni a·bachenge bano bon·ea na·a agana man·pagenma?

Disen: - Gipinni chanchianikode agana man·ja indiba angni chanchianide nikatgipaoni a·bachenge nikatgijagipao bon·chotea. De, ripengrang anga da·o chel·begipa biapochina re·na nangenga. Basakoba janggi tangan salrango Nokgipa ka·sae donkua ong·ode an·ching damsan salsao gronggriktaina ka·donga. De, dongchimboha.

Bilgrik enia Jangrik : - De, name re·angbo.

Disen, Bilgrik enia Jangrikko wat·e re·angani ja·mano an·tangko Sikimeoni chel·atsrangna mangsonge bakrobea ramako basee sesoagrigipa gisikni miksokaona songgabatangaha.

Jangrik: - (Disenko nirike) Oh Disen, na·a salgisakni askiko bon·e channe me·sokode angaba aema ditemani chiko dim·change na·tok sat·e me·sokskana man·aigenchimai. Indioba chingenggipa wa·alo kerosene·ko rudapode uko sikkimitna nengbegenghim.

Bilgrik: - Mai, ripeng na·ara bini aganana gisik sabeahama?

Jangrik: - Maiko na·ara indake aganenga, chikosako petrol·ko rudape so·o wa·al ching·ana chiningo pilak janggi tanggiparang gimikkon kamtokgen ine chanchiengama?

Bilgrik: - (Salgichiko nigito) An·tangtangko dal·e ra·tingachian a·gilsakni manderangde janggitangkon gima·atsrangna siengaha.

Jangrik: - (ka·dingsmite) Nibo ripeng, na·a ia a·gilsako an·tangko agrepile onia ka·na on·abe, ong·jaode an·tangko on·e ra·achin na·aba janggitangkon nasiatskagnok.

Bilgrik: - (Sko narongrenge) Oho! A·gilsakde, wagamna wagam, an·china an·chi a·jak sotgriken gimainoke ripeng.

Jangrik: - Indaken a·gilsakde ong·engaha, uni giminan na·aba da·on nang·ni gisikni silchidareko ta·rie donbojok ripeng, knalna sengchaode agre ja·manchakdugagnok. Na·a saksan iano tom·tomanina chanchie a·gilsak gimikko uchi chena man·gen ine ka·dongsoengama?

Bilgrik: - Chegen, salsao anga a·gilsakko chetelgen. Ia ka·donganiko ra·biten anga sina nangoba sigen enia tangna nangoba tanggen.

Jangrik: - Im de ripeng, nang·ni ka·donganian nang·na chusokanikoba enia cheanikoba ra·bagen. (Bilgrikni janggilo bilsa doktope done re·anga).

## CHAPBIDIL – 9.

Ku·a gital jakkalgiminrangni miksonganirang:

Jabimang: - Photo

Jarongdik: - Photo album

Tomtoma: - Motor-bike

Guama: - Narikkol

Guchon: - Kejul

Anti: - Bajar.

## CHAPBIDIL-10.

### “SAKSANI DUKCHI SAKGIPINNA KUSI”

Naringro salni attamchibara Jangrik Kasinchimangni nokchi rona re·angaha enia uni on·tisa salju·kurangna skangmangmang agital pante saksa re·bae Disenni una seanga sebitchitko uona ra·bae on·eahachim. Kasinchi noktango ku·chipra wat·e ka·saani bidingo ning·tubeet ta·rigimin ku·chipchangko knatime dringo saksan rosongengachim.

Jangrik: - Kasinchi noko dongamasai?

Kasinchi: - Oh, dongaba napaboda, mainaba re·baachima?

**Jangrik:** - Nanganan re·baade re·bapaachim, indiba na·asa agannakon knana sikjawakon.

**Kasinchi:** - (sengsrapgija) Maikoha, maiko de agane niboching.

**Jangrik:** - Na·ara Bilgrikna on·tisanangba ka·sajahama? Biade nang·na chanchitingen mandean ong·siangpilengjok, “Amaba me·chik saksana ka·sae duk ong·e ropachinade angkoba ba·atpajaenggenchim”, inerang aganrampilengjok.

**Kasinchi:** -Bia angna indakpile ka·saa ong·ode mainasa chanchigija skatang dake gisiko saani ku·arangko janape seatpajokna. Enia indinari name ropaengakoba gipina ka·saenga ine potdrae seata daka.

**Jangrik:** - Na·a an·tangni mikkronrangko mikchipe dakgenchimoba gipinrangde nigaoen dongpaenga. An·tang mikchipe dakgimin kamko an·tang nikjae gipinkoba nikjawa ine na·ara chanchiachima? Tol·na ska ong·ode gipinko tol·bo indiba angkode tol·panabe maina anga an·tangan nang·ni Kagrakko mikchaakode taleroken ma·sia.

**Kasinchi:** - Na·a iani gimin talen ma·siaha ong·ode name knabo, oe, anga Kagrakkoba ka·bebeachim,maina anga darang me·asaoba kakket-ket pangkime ka·dongna gita man·ja. Re·anggimin salja·kurango anga bang·a me·asarangni kakketgija dake cha·bokanirangko man·naha enia na·aba me·chik ong·e atchiosa iani giminde talbate ma·sibatgenchim.

**Jangrik:** - Oe, beben me·asarangba bang·an kakket ong·ade ong·bebeja indiba saksa indakana sakgipinrangkoba indaken dakpagen ine chanchigenchimode ian nang·ni dal·bea ma·sisretanisan ong·aigen. Enia uko agannode me·chikrangoniba kakket ong·gija dake me·sarangko cha·bokpilgipaba bang·bea. Indioba jekoba aganbo angade iana agrede aganna man·jawaha. Da·ode na·song sakgnisa ma·sia angade an·tangni ku·rachakanikode matchotataha.

Kasinchi: - Biara angna ka-saade ka-sabebeachimkon. Disenba bini giminan janape angna chitti see donanga ninakode iakai nibo.

### **SEBICHITNI BAK:**

Ka-sabea Kasinchi,

Anga nang-koba namnikgijade ong-pajachim indiba angni gisikon sakgipin me-chikna inditan ning-tubee ka-saani gngangchim. Indake ong-oba uan angni ka-saaniko ma-sisokna ja-manchakbeaha, enia a-sako una agre gisiktango gipinko nikoba namnikan griaha. Uni a-selan darangkoba anga an-tangna sejaha maina ua gride janggian mamungnaba gamchatagrigipa lekka chitsa gitasa ong-aiahachim. Anga an-tangni ka-saanio ka-dongbeen uko changsaode ma-siatna man-chongmotgen ine chanchiachim indiba salja-ku bakandikanichi uko chu-sokatna man-jaha.

Nibo! Ka-sa, nang-naba angni ua me-chikna ka-saagita ka-sagipa me-asa gngang. Bilgrik saksa gisik gnganggipa enia ka-tong jaksramgipa ong-a. Uni gimin na-a nang-ni ka-tongo ka-saani donga chu-gimikko ol-tome uona an-pilbo. Ua nang-ni giminan janggi tangengoba il-lenggija cha-gija ringgija siahagitan, singsolenggipa mikchirangna agre uko tangengpiti ine sakki on-na mamungan gripilaha.

Minggipin, angni nang ka-tongna dukko on-ahanina enia Sikimena tol-e aganaganina angko kema ka-pachina na-mango mol-mola maina angade Deskangkode ma-sipajachim. Na-a ia segimin sechitni ku-arangko mamung dakeba Sikimeona sokatpanabe ong-jaode uni enia Balikimni ka-tongona chatbegipa aramrangko iachin balpakatbana donga.

De, iakosan janapangna namnika. Bon-kamao ka-sabeachi Sikimena enia nang-naba angni ka-tongni sikaniko donanga.

Seanggipa,  
DISEN.

Jangrik : - Aiao, da·nang! Saksani dukchi sakgipina kusini. Oh Disen, na·ara mairongpilgipa mandechim! Indake ong·genchimoba a·ningo donggipa chikode chibima ine aganja, a·gilsakni mikkango, a·bigilni kosako joksalgipakosa chibima ina. Na·aba uandaken an·tangni ka·saaniko saksansa ka·tongtango donue mamiungkoba a·gilsaknade parakjaha, Sikimede danang mamungkon ma·sipajae nang·ni giminde dingtang dakesa chanchiskaenggen.

Kasinchi: - Sikimeba jari dakesa na·a, an·tangna ka·sae daka rikkirangon enia an·tang baksa golpoani bewalrangko niriken mai ong·enga ukoara ma·sipaigenchimbamo.

Jangrik: - Maiko dakgen jeni je gisik, haida ma·sioba nam·niksajaengnaba donga ba uandake ong·jaoba nang·ni namnikako nike nang·na wat·e on·skaengnaba donga.

Kasinchi: - Inghing indakede ong·chongmotjawa, angan iakode rake jechakna man·aigen.

Jangrik: - (Ka·dingsmite ) De, angade re·skainaha, roaba ru·utbengjok.

Kasinchi: - Oh, gualenga, anga Bilgrikna chitti sejokchim. Na·a ra·angjolna man·pagenchima?

Jangrik: - Angode ra·angna jechakanide dongjawa, bao on·ataibo. (Sebichitko ra·e re·anga)

## CHAPBIDIL – 10.

Ku·a gital jakkalgiminrangni miksonganirang:

Ku·chipra : - Tape recorder.  
Sikani : - Salam

Ku·chipchang : - Cassette.  
Naringro : - Sonibar

**“MIKCHIAN KA·SAAKO RIKANI KRONG.”**

Chigitcho salni sakkrit matchotmano Balikim Sikimeko chibima dilsani rikamona re·bachina ku·manchiataha. Sikime Aminchi baksasa sakkritchi re·angachim indaken tik ka·gimin salja·ku gita uona sokangna man·jaha. Balikim ru·utbea salja·kuna saksan mikutengteng asonge sambiterangko aktete chibimani chirangona gal·atengachim. Samtangtangchi dal·dalbegipa bolrangni cheksirango do·orangba ba·e mikoengachim enia uamangni ku·ranga inditan uni ka·tongko su·tingea gita nangepilengachim. Basakobasra uni sepangko bildingdinge uamng katchae roengachim enia Balikimara uarangko an·tangni saksanana an·tangko chonnikenga inesa ra·skaengachim. Ua chanchianirangara uni gisik ka·tongona biljrimbegipa duknirangko ra·baaha. Ua chibimani pangnajolna tipchanggiya jokenggipa chirangkoba uamangni jakgitelanina mikbuan gisikchi miktengteng niatengachim maina chibimani chirangde chasongnan baikamgipa ong·achim indiba mandeni janggide dikdiksani salja·kunasana ong·aiachim. Indaken a·gilsakni ong·telaigipa bakrangni gimin chanchie uni mikkrononi mikchirang tingtotna a·bachengaha, enia unomitimgan Sikimeba uanona sokbaaha.

Sikime: - Oh! Kema ka·pabone, angade ru·utbajok.

Balikim: - (Gisik jada Sike) Kema ka·nade man·genchim, indiba maibakai da·o nang·ni sokbana skang angni janggini salja·kurang bon·sona nangode uchi na·a angko tangpilatna man·jawahachim.

Sikime: - (Rang·gitik mikchi tingtota gang) Aiao, na·ade maikosa indake aganaljok! Na·ara angni gimina namen ma·siachim. Anga apani noko ong·paja indaken gipin gita skatang dakna man·paja, maina angade kangalbegipa nokdangoni, duk mikchi cha·tote nike janggi tangpagipasa.

Balikim: - Oh, angara maikosa nang·nara aganman·jokai, enia na·aba ukon bebe ra·aijokma? Angara nang·ni pilak ong·ako ma·sienba nang·nara ka·saengaba. (Sikimeni peoniko tingtotgimin

mikchirangko jakchi usite) De, ka·dingsmitboha.

Sikime: - (Ka·dingsmite) De indake ong·genode angkoba kema ka·skabo.

Balikim: - Nibo, Sikime, nang·ni mikchi tingtotsamangmang ga·akatanan chibimani chirang ditdoe a·gilsako dubiatnasiahachim. Indiba da·oa nang' ka·dingsmitachi na·a ia a·sakni an·bigilo cha·gipa sambolrangko janggi sikatpiltaiaha, enia uarang balwa baksa mesae an·chingna jakpa doktokenga.

Sikime: - Piltaie na·a balekachi ba ong·bebeachi angna dukko on·tainabeaha. Angade sina sinteman·gen, tangna ino neng·nikbee nikgen. Unigimin chasongnan ang' baksa ong·e angna kusiniko on·gen ine ang' jakrangko rim·e ku·rachakbo.

Balikim: - (Sko narongrenge) Anga ia ku·rachakaniko dakna man·jawa maina angni janggide ching·enggipa bilchamni wa·al gitasan ong·paia. Basakon tarakgipa balwa re·bae sikimitgen uko darangba ma·sisoja. Da·o nang·na ku·rachakeba kam matchotkujaon wat·e re·angna nang·ode an·tangni palo nang·na maiko done re·angpagen gosc!

Sikime: - A·gilsako na·asan siaigen ong·jaba pilak janggi gnanggiiparangan salsaode sitelnan nang·aigen, maina janggini bimangan atchiaoni a·bachenge sianion bon·a. Unigimin pilakan iana chanchiode mamungkoba dakgija dongana agre gipni dakdapani grigenchim. Indiba maibakai angni nangbaksa ong·engmitingo ta·rakgipa balwa re·bae nang' janggin' bilchamko sikimitna dakengako nikode anga angni jakparangchi donpenge ru·utbea salrangona uko tange rakkiangkugen.

Balikim: - Na·ara angna inditan ka·sachongmotama?

Sikime: - Oe, inditana ka·saa ine toe agana, apalara a·gilsakni a·rikingan chakjawa enia ning·tuako tonara aema ditemani tu·an sokchakujawa. Na·ara angna baditana kingking ka·saskaa?



Balikim: - Angade an·tangni janggiko so·ote me·sokana agrede gipin dakede parakna man·taijawaha.

Sikime: - An·ching da·o inditan ka·sagrikgenchimoba an·chingko ra·grikna on·jajokode na·ara mai daknok.

Balikim: - Dingtang ong·kate cha·painoke, cholitelja ong·ode rong·te dokemangba nang·ko aldupainok. Indiba indonga salrang sokbaode nang·nasa baditan dukni ong·gen.

Sikime: - Angnara maia, na·a jedake angko cha·dil dongdila pilakan angnade kusinisa ong·aigen indiba nang· ka·sanikosa dikdiksanamangba bon·changatpanabe.

Balikim: - Na·a angna mi bijakrangko songe channe on·engon uano ka·saniko sikchape enia pilak kamrangko dangdikengon ka·san baksa dakgenchimode, pangnaba angni nang·na ka·saade bon·changjawa.(dikdiksa jrip donge) Sikime, angaba basakoba na·songni songchi re·pana nanggenkon.

Sikime: - Ia ja·on chutti ong·joko re·boda. Hai, an·chingara re·nahama?

Balikim: - Na·a re·na sikengaha ong·ode re·aibojok.

Sikime- ( Asongaoni chakate) Hai indakode, Oh, gualenga na·a Kasinchini chittiko Bilgrikna on·na man·pagenma? Da·sio Jangriksa on·atenga.

Balikim: - Im, man·aigenba.

Watgrike noktangtangchi re·angtokaha. Balikim noktangchi re·angmitingo Bilgrikko gronge sebichitko on·aha. Bilgrik Kasinchini sebichitko man·e gisiko kusian suakpile noktangchina ta·rake re·angaha. Noktangona sokeon ua sebichito maikon seatenggen ine jajrenge kulie ninaba pa·manjaengachim. Indake gisiktango ku·mingna sika paksa kena paksa dake bon·kamao pilak ka·donganirangko an·tangni amikbrang chanchianirangchi

gimaatokman·oa ku·minggijan uko pakbri dake chite galatsrangaha.  
 Skatangko chusokatman·ahaoba ua an·tangan gisiko  
 dongtopiljaengachim enia una chanchitingen walni gittam salja·ku  
 ong·pilengjokchim. Walni bri salja·kumang ong·na dako gisik suk  
 ong·teljae chitgimin sebichitni tongrangko jorapile uko ku·minge  
 nisirangaha.

### **SEBICHITNI BAKRANG**

Ka·sara Bilgrik,

Seanirangko a·bachengna skangba ka·sabeachi angni  
 salamko on·chenga.

Da·ororode na·ara namen dongpaengama, angaba namen  
 dongpaenga enia nang·koba apanon ka·dongchakata.

Chong·motan, na·ara angna inditan ka·saemangba gisik  
 saani kattarangko janabe seataha. Nang·ni pilak janapgimin ku·a  
 mingantian angko gisiko saatbeaha, uni giminsa anga nang·ni  
 seatoba sechakatjahachim.

Minggipin, na·a angko kema ka·pana man·genchimode  
 pil·taic nang' ka·san ka·tongoni kattarangko watataibo. anga kusi  
 ong·been ra·chaksogen enia knalo kolej·chi seng·gnangkale  
 re·angbo.

De, iarangkosan seata, seanirango gualanirang dongode  
 ka·sapae kema ka·pachina bon·kamo mol·mola.

Nang·ni jik ong·na miksonge nang·ko sengsoenggipa,

**KASINCHI.**

Ku-minga matchotahaon Bilgrik gisiktango katchan gape opwal·ku ringatangkomangba sikimitna guale jako kep·a gnang tusiangaha, maina uni a·bachengo chanchie ku·mingna kensamsoanirangonide namen bikpilsrangahachim. Pring wal seng·ahao turamonio chakate nioara pringni 11 salja·ku ong·akosa nikaiaha enia un' a·damo an·dapgipa ba·rakoba opwal·ku kan·tong kamkongbakahachim.

Kasinchide uianmongchi un salja·kuna skang re·bae skang re·bae Bilgrikko nisobeahachim. Uidikni salja·ku batpilahaoba uko niksojae ua gisiktangon dingtangsrangesa chanchie duk mikchi baksa uianmongni palchakrani noksikosa saksan asonge salguri pindapa gita siksak il·engpilgija maikobasa chanchie dongaiengjokchim indiba uchide ku·ao katchan gape him, himpilesa ka·tong gisik gimiko chanchian suakpile da·osa siket baket au·miksiuengachim. Uianmongni salja·ku batahani gimin pilakan dringchi naptokenggnok ine chanchie ka·sin ka·sine matchotako sengjola gitasa re·bana mangsongskaengachim. Ua indake ong·engmiting salja·ku·chachaon sakgipinde rikit dangkit chanchie dukni wario dubiatako man·e sripe sinasipilengahachim. Maibakai Bilgrikba unomitingan saniba jako sikdrae salbaenga gitachachan uianmongni nokapona ta·rakbeen sokbaha enia uako ka·san bil ine aganana agre a·gilsakde gipin dake aganpana mamung kattakon man·jawahachim. Apsandake uaba palchakraon neng·take uko sengna ine chanchie uchina re·angoa Kasinchiko dringni noksiko saksan denggoke dongengako nikaaha.

Bilgrik: - (Ka·simang dake ) Ah, Kasinchiara class·chi napangjachima?

Kasinch: - (Mikjrao dake nido) Oe, be·en suk ong·jaengani gimin napangjajok.

Bilgrik : - (Mikkrono mikchirangko nika) Angara tusichipemung re·baningnaba man·jajok. Da·al mangmangkode kema ka·aibojok.

Kasinch: - (Mikchitangko usite): - Oh, mamungba ong·jaba. Bilgrik, na·ara angni mejalo on·atgipakode man·soachima?

**Bilgrik:** - Oe, man·soaba, indiba angade sechakanikode ra·bajajokai.  
(sepangona re·ange asongea).

**Kasinchi:** - Na·a mandean sokbaaha ong·ora maina ukoa nangkugen.(Adita jrip dongani ja·mano) Bilgrik na·ara angna indakpile ka·saeba re·angginimin salrango gisik sagni kattarangko seate angko indinari duk ong·ate roamo. Skangoni joljol an·ching da·ona tom·tome ka·saode sakgninan dukni dongjawachim.

**Bilgrik:** - Batanggiminde batanggimin, maina ukoara cho·bilkuna. Uarang pilakan an·ching sakgnini dal·bea gualanichisan ong·aha. Angaba enia na·aba saksa sakgipinko kema ka·grikjaha enia saksa sakgipina bamgrikjaha.Indiba da·ode indake ong·janaha enia na·aba indake ong·taina on·abea.

**Kasinchi:** - (Ka·dingsmite) Jedake na·a mangsonga, pilakan uandaken ong·gen. Ia angni janggi tangani enia pilak angni sikanirang chu·gimikan nang·nin ong·china anga nang·on pakwata.

**Bilgrik:** - (Kasinchini jakrangko rim·e) Anga da·alo nang·ni ku·sikoniko angna ka·saani ku·arangko knae inditan katchabea enia ia katchaaniko indin ong·gramataijawa ine anga nang·o rakbeen ku·rachaka.

Indake uamangni ku·sree roengmitingon uian mong jokaha enia uamangni bang·a ripengskaranga palchakraona re·batokaha. Uachin uamangni golpo dontongataniko man·aha enia noktangtangchi watgrike ripengskarang baksa re·angtokaha.

#### CHAPBIDIL-11.

Ku·a Gital Jakalgiminrangni Miksonganirang,

Opwal·ku: - ciggarate,    Salja·ku: - Somai ,        Sakkrit: - Gilja,  
Palchakra: - Canteen,    Aema Ditema: - Sagal,  
Chigitcho: - Robibal,    Jakrim: - Salam,  
Salneng·tak: - Chuti/Holiday.

---

[49]  
**CHAPBIDIL – 12**  
**“CHAWARI SING-SRUKA”**

Roro kari ja-ni 21-gipa salo uamang sin·karini salneng·tako man·aha. Balikimba Sikimena ku·rachakgimin gita uamangni song Nokrek Medan Gittimchi Kristmas cha·na pasikjole re·baaha.

Attamni bri salja·kumang ong·engjokchim unon uamang songona sokbaaha. Ua salrangara sin·karini salja·kusa ong·ani gimin balwa balsri baljaoba sin·sriksrik dakengjokchim, enia salnape an·dalsimsim dakbaengjokchim. Gittimni pilak chadambe enia bi·sarang songni kalramo asonge, re·baenggipa katchan salna tom·dake gisiktangtango kattarangko bikote ku·sree rotokengachim. Adita songni chel·kalgipa buring bolgrimni an·dalsrikgipa biaprangode seng·watrangba katchae ripamchiko ringope gisik ka·sinatna bilcham nat·e ong·katna a·bachengengjokchim. Ua an·dalgipa biapo rang·gitik nikronggijagipa mandeko nike pilak bakrao roenggipa pante·me·traranga jrip dake Balikimko niriktokengachim, enia ukon Sikimeni segipa ong·enggen ineba gisiktangtango chanchie saksa sakgipin baksa mitu·mitu knabregija agangriktokengachim. Adita re·angani ja·mano uamang nokona sokeaha. Unomiting Sikimeni ma·apa enia gittimni me·apa saksa uamangni nokni sa·rao ching·enggipa wa·alko asongdu·ule uni bimungkon minge maikoba agansoengachim.

Sikime: - (Rakdate) Maikosa na·songara anga dongja dongjao angko mitdake rotokenga?

Ma·degipa: - (To·tro ong·e) Sala jari na·a, chingade nang·kon da·alrangde re·bagnok ine agane rosoengachim.

Sikime: - Aiao, angade okkribengjokchim. Na·songara mi cha·sotokahama?

Ma·degipa: - Chingade da·sionin cha·mansojok, de na·songara da·osa sokbaaba, ja·su miksue neng·takchimboda. Anga da·o songgalgalatna dong. (Balikimni chadengako nike).Aia, Disende

asonggija chadengesa dongaiengama? Ia me·chikde pangnan jari daksimaia, ripengskanaba am·pok mora sale on·panaba ma·sija.

Sikime: - (Rake ka·dinge) Iade nang·ni Disen ong·jae, Balikimsa.

Ma·degipa: - (Miksepsep dake) Oh, angade Disenkon inesa da·sionin chanchiengachim.

Pagipa: - Baosa Disende da·anpakde re·bapajama?

Sikime: - (Duk man·a gnang) Na·songni Disende bachin angaba ma·sijajok. Hai Balikimara chiakolchi ja·su miksuna re·bora. (Sakgnian katomrarangko don·e re·anga)

Ja·su·miksuman·e re·bapile, Balikimde wal·timo asongrika enia Sikimede ma·detanggipako dakchakna songchakramchi napangaha.

Sikimepa: - Jong, na·ara Sikimeming apsan poraiengama?

Balikim: - (Kratcha·a gnang) Oe, apsan kolejon poraienga.

Sikimepa: - Nang·ni songba ua jolonianma?

Balikim: - Oe, chingade uanonin.

Sikimepa: - Nang·para maidakenga?

Balikim: - Angade manderang sing·paoba apani giminde agannan kratchaman·ade.

Me·apa: - De, mainasa paatangni gimina aganna kratchaskajokna

Balikim: - Gipin me·apaskarang gitaba biara dakpaja, maiko agangen, na·songba ma·sienggenkon. (Sikime pagipachiko nie) Apra na·songni ka·enggipa department·ni director ong·engachim indiba.....huuuuuuuu (sko narongrenga)

Sikimepa: - Oooh, na·ara bini bi·sasama. Na·an skanggipa depanterma?

Balikim: - Inghing ong·jasa, angade gnigipasa.

Unomiting mi cha·na okkamatchanga enia cha·man ringmane tusina re·angtokaha. Un attamon Sikimede ma·degipana uamangni ka·sa namnikgrikaniko ja·dil a·bachenggipaoni kambe bon·chotgipaonakingking tale roke agane on·tokahachim. Da·oa pilak songni nokni manderangan Sikimede segipa rimbajokna inesa jangbingbangna a·bachengjok indiba ua ku·arang Balikimni nachikolonade sokbakujachim. Kristmas ong·na gitiko ja·ni 23·gipa salni 5 (bonga) salja·kumango pilak mama ada dakgiparang Sikimemangni noko tom·dakaha. A·bachengode Balikimde mamungkoba ma·sikujae kristmas cha·na da·osa tom·tokna am·engakon inesa chanchiengachim. Indiba an·tangko jinmani jangchiona okamatos a·sel chong·motkode ma·sina a·bachengaha, Balikim ua ong·nasienggipa obostarangara maini a·sel chong·mot uko ma·sina sike pilakna skangba Sikimeko okamate sing·aha.

Balikim: - Da·oa maisa ong·na am·enga?

Sikime: - (Kratcha·a gnan) Maharirara tom·e nang·ko angna sing·sruke nina am·tokengana.

Balikim: - (sko doke) HUUUU.....! Basakgalgal na·ara aganbingbange on·jokai!

Sikime: - Salsade salsa iakora paraktelnan nangaigenba. Da·alba ian apsan enia knalba indakesan ong·aigen.(ong·katanga)

Da·oa Balikimde nawang dakana agrede mamungan griaha, pangnaba indaka salna chanchisoa dongpajae maiko maidake sing·anirangna aganchaken chanchie saksantangtangde man·dikbee nikatengachim. “Salantian cha·o·ringoba, attamrango nokgimik golpoe rooba Sikimea angbaksanchim, basako maidaka salja·kuo

agangitike indakaona sokatgalgaljok” ineba gisiktango Sikimekoba ka-o nangpilengachim. Batanggimin salrango ripengskarangni aganako knaha gitan me-chikranga indaken denggu dakrongbebeakon ineba ua chanchiroroe jinmaona re-baha.

Mamatang : - (Am-pokmako sale) Iano asongebo jong.

Chratang: -Jong, na-a mamungnaba jajrengna nangjawa, da-ode chingade na-song sakgnini ku-rangko talgrike dona mangmangsa tom-daka ong-aia.

Adatang: - Mamani aganna gitan kattakomangmang talgrike dona inesan chingade iakode dakenga. Ja-mano, nang’ baksa katta min-grika ong-ode nang-ni ma-apachiba re-e doe sing-e sane nipana man-gen inesa. Da-ode chingade nikoba nikjagita, ma-sioba ma-sija gitasa ong-aengkua.

Mamatang : - Sikime, na-ara nang-ni ma-dena agana gitan Balikimkoara mikcha-namnikbebeama?

Sikime: - Oe, angade kakketkoan ma-denade agana.

Mamatang : - Na-asan saksan cha-u-choluagita, rime sikdraa gita an-tangni gisik ka-tongomangmang donuari ka-sa-namnikaiaama, ma Balikimba nang-ni ka-sa-namnikako ma-sipama enia ra-chakpaama?

Sikime: - Chinga sakgnian mikchagrik-namnikgrika.

Chratang: - Indakode na-songara kattani gitade, kato rama dilsanko katna, sio obak ko-sanchi sina ine kang-kare kaman-giminsajok. Da-ode mosa-boning gitalni ku-a jokakosa rasi pe-akosa an-chingde knana nangainok.

Mamatang : - An-tang noa-namchikko bimang daknangpagijako. kam-a-sel ka-pana jakma min-gijako salbeke ra-beke on-a gita, mosa Balikimara kusinasan dakaia ingenma ma janggi tangao damsan dongrim ka-rime, ku-sa-rongsa man-ako suale rarone cha-pana ingenma?



**Balikim:** - (Skoko denggoke gambregija) Maiko maidake agannoksai!

**Chratang:** - Mamani-adani aganako sengsrap-don·srapgija ra·seke agana gita, enia noa namchikni silpa nampagijako agantaitaia gita dakaia. A·ba bolitchongoba do·ka manggisimoba bimang amak dakako nikean namnikgrikjok, kam gambregijako nikeba an·tangtangan segrikjok. Maiko chanchidamkuna maina jechake katkuna jeko na·a chanchia aganataiboda jong.

**Mamatang:** - Na·a ra·gen inoba da·ode chingaba kae sikede salrikrarikujawa. Nang·ko ba·e chie aldu mitanggipako ga·changbatede chingaba dakjawa. Da·si agangiminko agantaitaia gita, mosa-boning gitalko mande minggija sing·damdama gita, jong chingade nang·ko kae sale on·jolna, da·alan kam a·sel matchote dakna inede mangsongjaenga. Sikimeni aganako knaesa chingade noa namchika bebekon aganengama, ba an·tang mikchasmakesa tole roengama ine uko talnamangmangsa nang·kode sing·sandiesa nienga.

**Chratang:** - Oe mo, ja·man janggaloba mosa-boning sadu-jikcholba re·ang-doangoba sing·e sanen nija, sike-saleba on·ja inmangmangainok inesa chingara dakengaba, jong.

**Balikim:** - Oe, angade Sikimenade ka·saa enia an·tangni janggi tanga gimiknan miksonganide dongachim.

**Mamatang:** - Mitelbejok mosa, indiba na·ara da·ora bini silmitingnamitingonasan, gong·rak-wa·samitingonasan ingenma, ba janggi tangriman salrango daknang su·nangjae ja·kora-jakorana nangoba. mikgitok-mikkilengoba, sanamgija bisi biati man·e mitchiako sosiako done aganagita ki·amchip-gittamchip dakoba angni jik-deanjok bachi galku-ekuna ingenma?

**Balikim:** - Angon rasonggrie angbaksa dongengo indonga a·sel sokap sokode angara an·tang jik-detangko bachi galpa-watpakuna. Jeba ong·oba anginnnok!

**Mamatang:** - Na·a indinpaode, chingna ka·sachakpaode salko ja·ko man·chie nang·ni ma·apachide ja·mano re·ang·doange niainok.

Tom·ao donggipa sakantian mitele Balikimko chadenge salam ka·tokaha enia Sikimeko babilisichi okamataha. Unomiting mama·gipaba chi ringna uchi napangaha.

**Sikime-ma·degipa:** - Mamatangan Sikimeko name agane skie donangbo. Ia bi·sade pangnan skatang dakna gong·bea.

**Mamatang:** - Da·o jakritingatkujaoba do·si·do·dokkujaoba mahari dolsaode matchotjok me·a·me·chik ku·a min·grikjok. Da·ode tua a·tipsan turimjanasanjok damsan cha·rim·ringrimjanasanjok. Jik ong·kujaoba jikgitanjok seapa ong·kujaoba seapaa gitanjok. Uni gimin anti·a·kang re·oba noksul sa·ra rooba sari·maniko grong·namsangoba seng·a dake mesoknabe, dal·a dake re·paknabe, sing·e san·e nirongbo. Jari dake ripengskako gita agane·baleke ronabe, man·a dipetde name mesokna joton ka·bo, ong·jaode na·ade, noreng dakaiode jokatgnok. Nio·sariba an·tang ba·a·chiako indinde on·jawa, altutude watjawa, uko jokatgija daknade, bingkamate donade nang·ni jakonjok. Uni gimin na·ade name simsakbojok.

**Sikime:** - (Gisiko nangbee) Im.

**Mamatang:** - Kracha·na·jaksi chikna nangoba, ja·mano chinga me·asani ma·drang baksade jekoba dake niainok. Da·on biara Kristmas cha·manen re·angpilna am·engakonba?

**Sikime:** - Oe, ia ja·ni 27·tariko re·angna am·enga.

**Mamatang:** - Iano bini dongadipet noko tom·tom donge, je dongpa·man·pako tari·sachie on·pabo enia salja·ku joka ong·ode mama·adani nokchi re·dil·dodilpabo.(ong·katanga).

Tom·dakao donggipa pilakan cha·e ringe mosa·boning gitalko agane·golpoe· kalake·etale roani ja·mano noktangtangchi re·angtokaha.

## CHAPBIDIL – 12

Ku·a gital jakkalgiminrangni miksonganirang: -

Salneng·tak: - Chutti/holiday	Salja·ku: - Somai	Channan:
- Tarik (date)/ Number.		
Kalram: - Playground	Katomra: - Bag.	Roro
kari: - December.		
Ka·bidingdam: - Department	Ku·japinik: - Director.	

---

**CHAPBIDIL – 13**  
**“SOKBITCHI GRO”**

Kristmas cha·man ringmane donsogimin 27-gipa sal sokahaon Balikim noktangchina re·pilna tariaha. Da·o ia salja·kuo uamang kolre kapramochim.

Sikime: - Oh, na·ade re·angbebena am·engjokmo?

Balikim: - Oe re·ainok, angade pangnan aganatangkode pe·rongja inean na·ara ma·siakonba.

Sikime: - (Skoko gakgue) Indioba da·ora angade nang·na ka·pakrike nikatenga.

Balikim: - Ambin ra·jok dongjokoba, basakobarangde da·o gitan dikdiksa salja·kurangnade watgrikna nangaigen. Unoba na·ara ka·pakaigenma?

Sikime: - Unode uno dingtangpanok.

Balikim: - Ma, nikabeekpilen unode angkon nidikainokma?

Sikime: - Indakede ong·paja da·nang. (Kolre re·chakatna a·bachenga).

Balikim: - De roaibojok, angade uchin nang·ko sengsoainok.

**Sikime:** - (Mikchi ipake) De indakode.

Balikim noktangchina mamung a-selgrian sokangaha enia bilsigitalko ma·apa baksa damsan kusi ong·e noktangon cha·aha. Bilsigitalo Dongro kari ja·ni 18-gipa salo adatang Saljatchi Balikimni Sikime baksa ka·sa namnikgrikengako rorimska ripengranganiko knaaha, enia uana gisiktango jonggipako ka·o nange pagipana agane on·a ine ua nokona tarakbee re·baaha. Unomiting pagipa enia ma·gipa nokni bandasalo asonge rosoengachim.

**Ma·gipa:** - (Saljatchiko niso) Ia bi·sade dikdiksaba nokon dongna changja. Ichi bik uchi bik jengjengsimaigen enia una agrede mamung kaman dongjawa.

**Saljatchi:** - Oeba, nang' ka·sabegipa depante Balikimde bilongen nama. Anga da·o bini a·selan ripengskarangni jakchi baditan kratchaatako man·e re·baenga. Haida, knaode angna bateba na·songan ka·a nangbatnaba donga. Na·songni depante Balikimde saoba peon·ni demechikko ra·na am·enganaba.

**Pagipa:** - Baoni sani bi·sako ra·na am·engana?

**Saljatchi:** - Banoniba Grimcheng ineanma, Grimseng inesama, uni demechik Sikime ingipako mikchaenganaba. Pagipara na·song Department-on badiaba songo peon·ni kamko ka·enganaba.

**Pagipa:** - Oh, ma·siatjok ma·siatjok, mejao promotion-na sedoatenggipa ong·enggen. Ukoara Grimsing ine minga oe. Bao Balikimko okamatboching.

**Ma·gipa:** - Balikimna, Balikim. (Balikim re·baa).

**Pagipa:** - Balikim na·ara baoni sani demechikko maidakgipa nokdangonikosa ra·na am·enga?

**Balikim:** - Pagipade peon·ni kamko ka·enga indiba demechikgipade

**ang' ka-tongon da-o dipetde dongenga. Uamangni nokdang choliade ong-ja indioba salsamangba okimude chakja. Bimungkode Sikime ine minga enia bidana brange an-chingni nokni adita chel-kalgipa noko dongnape poraienga.**

**Pagipa: - An-tangni bidani enia nokdangni gimin chanchie cholikalgipa nokdangni deko sandie kimna dongna changpajama na-ara? Ua peon tektokara nang-ko dal-e do-si-do-doke on-pana man-genma. Bebegita dal-e dake on-a man-genchimoba anga enia gipin angni ripengskarangara maikai ua an-tangtangni peon-ni nokchi re-ange uko mande ra-e salam ka-e re-bagnok. Unbaksana saksan man-e cha-begipani depante peon-ni demechikko ra-nakenga inora knatogenma? Na-a, angni janggi tangenga dipetde uko ra-na man-jawa, on-gijako drae dakode angko pagipa ineba channabejok.**

**Saljatchi : - Silaba silpaengosai uara, ukon jara dake ra-na am-engakon. Nidikara bon-aijok sala gatani a-sel a-sel angnasa ong-sibengjok.**

**Balikim : - (Mikrengreng nie) Na-ade ja-kop sike cha-namangba cholisrangkuja, dada**

**Saljatchi. Gipinni gamo pangchake gipinko chonnikpanabe, na-a an-tangosa ga-chake an-tangko "ANGA SALJATCHI" ine gipinrangna mesoke gangbo dake rasong chana skibo. Angade silako namako nangja, tom-tomanikosa nanga. Man-e cha-begipani gamna batede kangalni ka-tongoni ka-sanenggipa gisikni gaman gamchatbata. Uni gimin ia rajani singhasonko wat-e kangalni chonbegipa jamdapon re-angna anga neng-nikjawa, enia jensalo ong-katanggen unon pilt-aie ianona ga-daptaiani dongtaijawaha.**

**Saljatchi : - (Asongaoni chadenge) Sala bi-sa na-a, ua me-chik saksani giminan adatangko datang, pagipako pagipa ingija krengdopila dakbaengama? Intangode tilbrangpile ga-watatsranggen anga nang-ko.**

**Balikim: - Ua me-chik saksako mikchasmake una na-songko krengengde ong-jaenga, indioba na-song pilakon ka-sin ka-dimachi**

darangkon aganjaengani giminsa angade iako dakenga. Kanggalba tangka-paisao, rang-gamosan ja manchakpaia, kangkal ong misikana gisik ka-tongde a-gisi gita porongrong ong-ja. Na-songni nikanio saoba ia a-gilsako man-e cha-gipa rike donggipa saksamang salgisak bangbango kadingdee nok te-sakomang rikahama? Dongjane dongja, darangan a-on ritokaia enia a-gimikni pilak mandean cha-a ringa am-chakjae sonako rikwakwake cha-gipadegri pilakan apsan mikon cha-aia. Indide iano bano kangkal enia man-e cha-gipani gisepo dingtanggrikani donga.

Saljatchi: - (Chaktonikjae). Iano belbeldame dongchanabeha nang' mamani jamgopchi belbelebo.

Balikim: - Re-anggen oe, sonachi dal-bee nitobee rikgimin dringba chonbee rikgimin jamdap baksan apsanaia, maina bimungde gimikon nok inesan mingaia. Uandake kangkal enia man-e cha-a pilakkon mande inesan aganaia. Kanggalni an-chiba man-e cha-gipa rike donggipani an-chiba apsan gitchakaia enia darangkoba Nokgipade rong-krekniko ta-rija, a-dimuonikosa pilakkon dakaha. Dakgipa Rugipaan darangkoba mikkang nitegija apsan dakahaode uko baseenggipa na-songara sawarangskasajok?

Pagipa: - Achak bi-sa sala na-a pagipakon skipilna am-engama?

Balikim: - Ong-ja apa, angade nang-ni bi-sasa. Anga achak ong-ode na-aba apsanang ong-ainok. Uni giminan na-a pangnaba chiode atteko den-e ronabe ong-jaode nang-kon matpilnaba donga.

Pagipa: - Oh! Da-ora angkon pagipakon achak solbasrangengjok? Indakako knapile ronasa angara nang-koa aldujokma? Bakbak na-a da-on ia nokoni ong-katangbo.

Balikim: - Ong-ja apa, ia pilakan nang-ni ku-sikonisa ong-katenga angoni ong-ja. Beben nang-o tangka-paisa bang-a indiba na-a uachi ka-saaniko brena man-jawa. Na-a mandena bate gamna ka-sabata enia nang-ni gam angna baten nang-na gamchatbata. Uni gimin anga ia nokoni da-on ong-katangengaha.

**Ma·gipa :** - (Ka·tong be·e). Angni kattakode knagija re·angna am·aiengjokma, baba?

**Balikim:** - (Re·ako dondike) Na·an angko a·gilsako atchiatahani gimin jekoba angni kosako na·a ge·etna bil man·a. Indioba ia cholko ra·e angni ka·tongkosa bi·panabe. Aganbo ama, anga nang·ni kattako knana sengenga?

**Ma·gipa :** - (Mikchi singsolenggipako ipake). Nibo baba, chinga nang·ko chonaoni aldue dal·atgipa ong·a. Darang ma·apaba detangtango duk ong·e janggi tangatna sikja. Baba, na·a chang·samangmangde nang·pani aganakoba knachake nibo, maina ma·apade ja·man ja·wilniko chanchisamsoesa, ki·sang mikkang niksoesa pilakkon agana enia skia. Uni gimin na·a ua me·chikko gualaibojok, haida iaba maiba namgnini giminsa ong·engnaba donga.

**Balikim:** - (Mikchi usite) Ama, na·ara nang·ni sokbitchina gro rikengama?

**Ma·gipa:** - Aiao dede, na·ade mai dakesa aganaljok! A·gilsak ong·chengaoni da·alona kingking nang·na agre darangni degipaba ma·atango indaka sing·aniko sing·kujaenggenchimkon. Darangni ma·gipaba detango an·tangni sokbitchina gro rikade dongkujaenggenchim. Na·a ua me·chikna indakpilesa ka·saa ong·ode re·angbo baba anga nang·ko champengrikjawa enia angni tangkuenga dipetde ia nokni dogarango nang·na o·en donkuaigen. Indiba na·a nang·ni nokdngni manderango pangnaba gualpanabe.

**Balikim:** - Mitela ama, gisik gnanggipa depante ja·mano jekoba chanchigen.

Balikim nokoni ong·kate re·angaha enia ma·gipa ka·a be·pile grape uko nirikuengachim. Ua ma·ani ka·tongo baditana kingking jrimbegipa duknirang ong·enggenchim ukode ba·e·chi·e nikgipa enia detangna ka·sagipa an·chingni ma·giparangna agre gipinrangde

ma·sipajawachim. Balikim da·o bachi re·gen uko chanchie jajajiji ong·engachim indake ua adita salrangna gisikko tom·tomatchengna mangsonge ripengtang Jangrik·ni nokchina re·angaha.

Jangrik: - (Balikimko nisoe) Bachinisa Balikimde? Aia, da·alde mandekoba nang·kode duk man·enga gita nika.

Balikim: - Sikimeko ra·na am·ani giminan angkode da·alde nokonikon a·rikgalatsrangjok.

Jangrik: - Ma, na·ara nang·ma nang·pani katbo inanaan katsrangbebeaiane.

Balikim: - Achak gisikgrigipaan ku·sa katbo inode kataiengo, da·o anga mande ong·e uko knaja dake donggenmade?

Jangrik: - Da·oara na·ade an·tangkon achak baksasa tosusasrangaijokma? De, na·a an·tangan an·tango achakna batede gisik dongbatkalkua ine ma·sikuengode mainasa gisikgrigipa matburingni kamko ja·rikengjok?

Balikim: - Oho, gramchi ding·ol ran·atna ine bol salikimona re·baoba da·oa mamung namgnian grijok! Kosako bolbijak dongama dongja uko nigitochenggija ja·pangmangmangko nie re·baoa rikechide mamungan gri cheksirarasajok!

Jangrik: - (An·tango jaksi ote) Beben ripeng nang·ni aganna gitan ia bipang bijakri cheksirarasa, maina je biapon ia bipang chaaha ua a·ao a·salan grichim. Indiba je mandean ia bipangona ka·donganiko ra·bite re·baaha, ua mandeko pangnan ia bipang jakaride watatpilrongja. Ripeng ine aganon uni miksonganio dingtangmancha ning·tuani gang. Sukni salosan bakrimgipako dakmikgipa ine agana, maiba man·gnina miksonge besa ka·gipako cha·bokgipa ina, enia dukko chelchakgipa mandekosa ripeng ine minga. Indioba ripeng na·ara da·o ua chubegipa boloni ong·one uona ga·dopilna nengrabeen ka·dongsoengama?



Balikim: - Manderang jedake on-gipa biapo janggi tangenga ugitan angaba tangpagen. Na-a je bolkon miksonge aganengachim ua bol rikeonade angko apasa gatdoachim indiba anga an-tangsa panggipin hipangonade maldona joton ka-nasienga.

Jangrik: - Namjok ripeng, namjok. Je mandean an-tango ka-dongani gapa, ua mande pilakkon dakna am-a. Na-a nang-ni sika dipet angbaksa dongna man-gen indioba cha-a ringaosa sukniko man-janaba donga.

Balikim: - Angna angni janggiko tange rakinanan mangmang on-aibo enia una agre pilakkon nangdapjawa.

Jangrik: - Indake ong-ode na-a jajrengna nangjawa.

Uandake adita ru-utbea salrangona kingking Balikim Jangrik baksa dongpaaha.

### CHAPBIDIL – 13.

Ku-a gital jakkalgiminrangni miksonganirang: -

Kolre kapram : - Bus station	Ra-dedo : - Promotion
Ka-bidingdam : - Department	Ra-rura : - Peon
Paltak : - Dorkasto	

### CHAPBIDIL-14 “JANGGI GIMAGIJA SIA”

Balkimni nokoni ong-kataoni antisamangni ja-mano pagipa uko pilak biapchikon sandibeoba nikjae, Sikime pagipaan banoba donuengnaba donga ine chanchipe, Sikime pagipako noktangona okamataha enia demechikgipaba uko ja-rikbapaaha. Uamangni re-bamitingo ramaon pilak ong-gnirangkode sakgipin manderangni ku-aoniko rongtalbeen knaman-baahachim maina darangan uamangni noksul songsulrangba ua nokdangko nikdikja ingipaan

grichim. Uamangni man·ne cha·ani, rike dongani giminde ong·ja indiba dal·a daktinganina enia kangalrangko chonnik onik dakanina pilakan uamangko miknengtokachim.

Saljatchipa: - (Ka·o nange) Anga nangko maina miksonge okamataha uko na·a ma·sipaama?

Sikimepa: - (An·tangko onatbee) Ango me·tra sokgimin demechik saksana agre mamungba dongja. Enia ua nang' depante baksa ka·sa·namnikgrikenga. Uana agre angkora maina nangpagen? Pante bi·sa gisik dambe jekoba kusina dakaigen uni gimin na·asa me·chikni pagipa ong·e demechiktangko agane skie ra·na nanga, ine aganasa okamatenggen. Anggita kangalpagipade demechik saksani pagipa ong·na nengrabeani ong·ja . Uni gimin jekoba knatimana agre mamungkoba dakpana cholgri.

Saljatchipa: - Angni miksongako ma·sisoahani gimin man·beaha. Indiba gisik rakbo, nang' demechik Balikimna ka·saenga ong·ja gamna mikbokesa dakenga. ( Sikimechiko nie) Na·a me·chik ang' depanteko cha·minokgipa na·a nang·ni pagipani kamko nangnikkua ong·ode da·al dipetan Balikimko gualbojok.

Sikimede an·tangni a·sel pagipasa kratchana nangani gimin suk ong·jae unon kikkikari grape dongaiaha. Unomitingan Balikimba uamangni re·baani knakuko man·e noktangona re·baengachim. Sikime enia uni pagipa dukman·bee noktangchina re·pilna ine ong·onbaha.. Uamangni barioni on·tisa re·jitmangmangpition Balikim Sikimeko nikate adita chelkalaoni Sikimeko minge okamataha. Sikime nachilsonggija pagipani kisangkisang nipilgija re·akosan re·angaiaha.. Da·nang! Balikimde pagipani namgijanichi ka·sabegipa ripengtangni namrenganiko man·aha.

Balikim: - Sikime, apa namjaoba angara mai gualaniko dakjok? Angara nang·na ka·sajama? Ka·saen nang·ko ja·rikengachimba! Angko watgalaigenma? (Salgichiko nigito) Oh Salgisak, a·gilsako ka·sagipako saksakomangba angna watatjahama?

Sikime: - (Balikimchina an·pile) Oh, Balikim, angara maiko dakbo?

Sikimepa: - (Sikimeko jako salike) Pagipa dagrange watatjok da·o depante kalstape rona am·skaenga?

Balikim: - (Mikrononi mikchi baksa) Apasa gisikgri dakenga angade maming namgijako dakpakujaba. Angni pagipani palo anga nango jak chopjole kema bi·a,ka·sapae kema ka·pajawama?

Sikimepa: - Da·o na·a kema bi·e maiko man·kugen?

Balikim: - Anga da·o apani noko wat·e Sikimeonan re·baengahaba.

Sikimepa: - Ang' demechikko ra·na na·ara japrako baditarangko kamka·e man·paenga, jong?

Balikim: - Angade da·ode pelsa kapsamangba kamka·e man·paade dongpakuja.

Sikimepa: - Nang·ni gamchata naia paia so·gitchakagitamangba ong·jaode nang·para mai nangbakanasa bil man·bee chonikatjok? Alamala cholikalesa indakpile chonikengakon inesa! (de·mechiko jako rim·e salanga).

Sikime: - (Re·roroe) Angade maiko dako namgen mamingkon ma·sijajok! Na·an name chanchiaibo, Balikim.

Balikim: - (Nokchina mikkange chrikata) Oh, Saljatchipa, angni janggikomangmangba a·gilsako tangatna sikjahode da·o nang·ni nokmikkangon janggi galgen. Angni janggini golpo ia nokonin a·bachengaha ia nokon bon·aniko dakgen. Angni siani ja·mano angni manggisikomangba na·ade dangtapnabe maina nang·ni jakrangko salantian kangalrangko cha·bokna enia toginasan jakkalaha. Unigimin angni bikapmangmangkode dukgri tusina on·bo. (Krua dokratangoni ate achokko bikote) Oh, Sakni Gitel,

angko kema ka·bo.

Ma·gipa: - (Sambaona re·bae) Baba Balikim, na·ade maikosa dakna am·engjok. (Rake chrike) Oh, Sikime, na·ade janggi siakoba nina man·naigenma?

Sikimepa: - (Jako rim·ako wat·e) Sikime, Balikimko nokchi rimbabo. Angade re·sognok.

Sikime: - (Ka·dingsmite) De, baba, rimanggen.

Sikimepa nipilgija loljol songtangchina re·angpilaha.  
Sikime da·o pagipani ge·etako man·e Balikimona re·baaha.

Sikime: - Balikim, hai angming nokchi re·boha.

Balikim: - Nang·ni ma·apa namnikja ong·ode angara sana ka·donge re·pagen, uchia?

Sikime: - Baban nang·ko rimechina watatahaba. Da·o bian namnikaiaha sawa maiko dakkugen ?

Ma·gipa: - De, baba na·a Sikimemingan re·angaibojok. Biagride janggi tangjawaha na·ade.

Balikim: - Ama, na·ade angna ka·saemangba pilak angna ong·enga a·selrangko nie dongna man·naiama?

Ma·gipa: - Indake ong·jachim, baba, indiba aganna skode jedakeba agannaibojok. Angade da·sionin maiko dakgen chanchinan changpiljae ja·sku dipane Isolo biesa dongaiaha. Nibo, baba, nang·na ka·saoba angara maiko dakpana man·gen? Nang·pana chakoa nang·na ka·sagija gita dakaigen, nang·na chakoara nang·pani kosako re·a gita daksikaigen.

Balikim: - Segipa ong·oba namgijagipanara maina chakenga , na·ara?

Ma·gipa: - Ong·ja baba, na·ade ma·sipakuja. Beben biade namja indioba angara me·chiksan. Ia pilak namgijanina uni kosako angaba namgijako dakpaode biara sano ka·donge janggi tanggen? Jensalo bia a·gilsakni pilak manderango ka·donganiko jakwatgen, unode haida ianan batnaba donga. Unbaksana angade bini jikgipasa ong·ani gimin bini kosako matnanganirangko dakna kraja, maina chingade be·ensan ong·atako man·gimin ong·a. Saoba biko namja inahaode angaba namgijagipan ong·paha enia anga an·tangan uni jikgipan ong·e unkosako dakahaode sakgipin manderangde maikode dakjakugen!

Balikim: - Indake ong·ode kema ka·bo ama. Angade apani kosako kragija kamrangko dakachi nang·naba dakmanaha.

Ma·gipa: - Maming ong·jaba baba, da·o na·song re·ange katchae dongebo enia pilak dakna nangarangkoba chingchide nangatnabea. (Sikimechiko nie) Sikime, nang·ni ma·a·pa enia ma·drang maharirangna, “Balikimpagipani pilak kragija dakanirangna jikgipan kema biatenga enia pilak dakna nanga kamrangkoba biade na·songnasa pakwatatahana” ine aganpabone.

Sikime: - De, agangenba, mani.

Ma·gipa: - De, re·angchimboha.(Nokchina an·pile re·anga)

Balikimde da·nang pangnaba ma·a·pani chelao dongrongpakujae noktangni manderang nampajoba atchiaonin uamang baksa ong·e dal·bahani gimin ka·pakbeaha. Indake ong·genoba A·chikni niamo me·asade chang·sade chang·sa ma·apa enia pilak nokni ba·rimaskarangko wat·e re·na nangtelaia. Ian ning·tube chanchigenchimode a·gilsako janggi tanga gimikna nokoniko saksanko chel·begipa biapchi rikbrange galata gita ong·a enia iako A·chik me·asarangna skanggipa janggi gimagija sichengani ineba agana man·pilgen. Balikim noktango nikatengkua dipetde mikchi u·sitjoljole nipilrokroke Sikime baksa re·angaha. Uachi ma·gipaba detang Balikimna kalime sana a·bachengaha indiba uani gimin depantenade maming knankukoba watata dongjachim, maina

uni kusiko dukona bikpilatnade ma·gipani sikani ong·jachim.

---

## CHAPBIDIL – 15 “KATCHAN SAL MIKCHIN WARJO”

Balikimni re·angni antigni ong·ahaon, pilak ma·drang maharirang damsan chanchirimaniko dake uko Sikimena do·si do·doke on·na tik ka·aha. Manchigimin salsokoa Balikim ma·gipa enia unbaksana adita sepangkalgipa maharirang jemangan ua do·siaona re·bana nangnikgenchim, uamangko rimna re·anggiarangba sokbahachim indioba Bilgrikna agre darang gipin saksamangba uamang baksa sokbajaha. Do·sina ta·risogimin biapo pilak uni wilwilao donggipa noksulni manderang enia bang·bea me·chikni maharirang ka·dingwareke uamangko nisotokengachim. Balikim enia Sikimeba an·tangtangni janggi tanganiona miksongsogimin salko nike gisiktangtango katchaanian suakpilengachim. Mahari rimna re·anggiarangni jakarisa re·bapilaniko nike uamangko nisoenggipa sakantian gisiktangtango jajrengataniko man·tokengachim, indiba a·bachengon Balikimma·gipani ku·pakgimin ku·achi adita ka·donganikoba man·tokengachim. Indake ong·genchimoba Bilgrikan Balikimko grongode mikchian raksakajawachim, uni gimin ua tomani matchotkujana kingkingde uko gronggija dongsrangna chanchiengachim. Indiba uamangni nokona adita chelengpition an·tangni ma·a·pa enia maharirangko niksojaoba sakki sabitna gita ripengtang Bilgrikko niksoen Balikimba on·tisa ka·dongkalaniko man·skae gisiktangko kusi ong·atsobengachim.

Balikim: -(Ong·katbae) Na·song baksa re·bapagipa ang` ripeng Bilgrikara baosa?

Re·anggipaoni: -(Jaksi ot·e) Ua, ampokdokroo asongenga.

Balikim: - Bilgrik, gipinranga baosa, na·a saksansa re·baiama?

Bilgrik: - Oe, nang·mara saengana, indaken

mikkangpanamang mang angko saksanko watataijok.

Balikim: -(Suk ong·bregija) Ban saenggensai uara, asolon re·bana sijjoljaisa tolatenggen madrang. Angan bisongkoara re·bajawa inen chanchisoenga.

Bilgrik: -(Ka·a chakna amjae denggoke rake grapa).

Balikim: - Mai ong·a Bilgrik, na·ara maina grapenga? Maiba ong·ama?

Re·anggi paoni: -(Nablok dake) Nang·mara mni salon sijokna, chingaba mejalo gopa matchote re·bapilakosa nikaiaijok!

Balikim: -(Ta·rigimin bibalrangko gobrane) Aiao! A·gilsakan bon·jok! (Ja·sku dipane skoko ampokmadokro done kikkikari grapa).

Sikime: -(Ong·katbae ong·enga a·selrangko nika) Da·oa maisa ong·jok?

Balikim: -(grape) Sikime, angni ma·gipade sijokna, angade saksan brangaignok! Angkode amani manggisikomangba nirikpana knankukomangba on·jajok! Oh, Bilgrik gipinrang angko gualoba na·ade gisik ra·na nangachimba!

Bilgrik: - Angko kema ka·aibojok ripcng, angaba nang·ko gualade ong·jachim, anga ia songona re·baen na·songni bimingko minga na·song sakgniko sandiachim indiba darangan ma·sitokjaha maina angara ia gittimni bimingkode ma·sipakuja enia nikpakujachim.

Sikime: -(Balikimko gipake) Na·ara maidakesa an·tangko saksan ine aganenga? Darang gipin nigaloba angade siaona nangbaksan ong·aigenba.

Bilgrik: - Duk ong·ani salan sokahaode pilakkon knasrange duk ong·bo. Nang·ni ma·gipa sina skang angna indakeba aganangaha.

Biade na·songni ma·gipa chong·motde ong·jasana, skango nangbaba na·songni chonengmitingo nangma·gipako gale nang·ko enia Saljatchiko rime katbae biko ra·eana. Unbaksana nangpani galbaani ja·mano nang' ma·gipa depante saksako barikkuachimna. Indake ukoba sandichina nang·ko agane donangenga.

Balikim: -(Mikchi u·site) Da·o anga bikoa baoniko sandigen.

Bilgrik: - Na·a uko sandina nangjawaha, salsao anga uko grongaha, ua mande namachim enia un dakchakanichin anga kawinchiko man·pilaha. Unsalon ua an·tangni gimin talbeen aganahachim enia un agana ku·arang baksa nangma·ni aganaming namen melibeachim.

Balikim: -(Sengsrapgija) Uara sawachim enia da·o biara bano dongenga?

Bilgrik: - Bimingkode Disen ine mingachim indiba da·o bano dongenggen ukode angaba ma·sija, haida Sikime ma·sienggenkon?

Sikime: - Disen! Haida nang' agana gitan ong·bebeakon, maina mikkang bimangba apsan dakangbebea.

Balikim: - Ong·a inc aganon maikosa uarangni gimin belbeldame dongenga. Ma·sia ong·ode bano dongenga ukosa aganboda.

Sikime: - Angaba bano da·o bia dongenga ukode ma·sijake na·a.

Balikim: - Da·oa nang·ni adatangkoba sandina nangenga enia angni jonggipakoba unbaksana ma·gipakoba grongna re·na nanggen. Unigimin an·chinga pilak maharirangko sandichengan ja·manosa do·siainahamo Sikime.

Sikime: -(Jaja jiji dake) Na·asa, angade maiko aganpagen.

Bilgrik: -(Suk ong·bregija) Indioba Disenni bilsigittam ong·engpition nang·made siman·jokna.



Balikim: - Ha, a·gilsak gimikon ma·gipa sakpraksan dongaiachim indioba angode sakgni gnangchim. Indake onggengoba da·oa rasonggrianichi pilakan indinsa ong·aiaha.(grapna a·bachengtaiaha).

Sikime: - A·gilsako pilakan salsaode siaigen. A·gimikni mandean siani salkode gachangbatna man·ja, maina ia a·gilsakde an·chingni jringjrotna dongchakram a·dok ong·ja. Unigimin na·a agrepile ka·abenabe. Da·ode na·ade nang' jonggipa Disen bano ong·enggen ukosa chanchibo. Haida iako dakanichi nang·ni agana gita na·a nang' ma·gipana gro nanggipako jakchotna man·naba donga.

Bilgrik: - (Sikimeko salseke) Duk man·enggipa mandeko rinoka ku·achi agane duk on·dapnabe, uko duk ong·chinan saksan watbo. Bia bini mikkrononi mikchi ran·nahaon an·tngan ka·dimeaniko man·aigen. Duk man·enggipa mandeko rinoka ku·arangchi agane uni dukko bariatnabe.

Sikime: - Aiao! na·ara mairongpilgipa mande, bia duk man·e chanchiprete sina bona nangode na·a uko tangchaatpilgenma?

Bilgrik: - Dal·gimin mande mamingsaloba ma·a·pani siana ka·pake janggitangko gimaatjawa. Indiba beben mikchatang ka·satangni ba jikgipani ba segipani sina bon·na nangode uana kenchakna nangani gnang.

Me·apa: - Kalimgipa, dukman·enggipa mandeni mikkango maikosa na·songara bi·sa dake jegriktokengjok.

Bilgrik mamungkoba agangija skotangko rimroke noksamchipakna an·pile re·angaha. Apsan salja·kuon Sikimeba mamungkoba dakna cholko sandibeoba nikteljae dringtangchina dariange turamao kikkari saksan grapbeaha. Pilak tom·anio dongpagipa sakantian katchaani pal kalimanikosa daktokna nangaha. Bi·sa desarangba kalgrike jikjake roaniko dondike jripjrip ma·a·pani sambao rengkonesa dongtokaiengjokchim. Me·apa budepa sakantian skotangtangko denggoke sada slemprak remremako wal·ku dimpang dimpang opari sima ninasan cholaiaha, enia me·chikmarangde ganna ku·srechhi mikchitangtangko u·site

gingjo·olbaako “srip-srip” ine salsripaana agrede cholan gripilahachim. Adita sengkuani ja·mano Balikim an·tangan mikchiko usite chakate jinmana indake aganaha, “Beben da·al katchaani salchim indioba rasong griachi ia katchan sal mikchin warisa pil·skaha. Na·simangba pilakan ma·sia, da·alo angna dal·begipa dukni sokbaha. Unigimin da·alde ia do·sianiko chusokatna man·jawaha, unbaksana angni jonggipa Disen enia boning Deskangko sandie nikujana kingkingde chinga do·sianiko dakjawa. An·ching pilakan ma·sia, a·gilsako mandede salsaode salsa wattelnan nangaigen indiba mandesan ong·e an·ching sakantian an·chingko wat·e re·anggipa bakdrangna kalima. Uandake angni ka·sabea ma·gipa angko wat·e re·angaha enia iana anga bilongen duk man·a indioba pilak song·man chanmangimin mi bijakrangko an·ching bachi maidake galgen? Unigimin pilakan uako amasagini janggina song·galatgimin ine chanhie cha·e ringe re·angtokpabo”. Tom·ao dongpagipa sakantian uni agananiko ra·chake song·gimin chan·gimin mi bijakrangko cha·e ringe noktantang jamtangtangchi re·pilangtokaha. Salgipino, Balikim an·tangni jonggipa Disen enia boningtang Deskangko sandina gita re·ongkatangaha enia Bilgrikba ua kamo unbaksa jak on·paha.

---

## CHAPBIDIL-16

### “KAMAN DAL·A CHUSOKANI”

Balikim enia Bilgrikni gimagimin bakdrangko sandina re·ongkatania chriko de·doe miksongagri brako watata gitasa ong·aiachim, maina uamangni dongenggipa biapni gimin on·tisaba ma·sisriksrik dakaan grichim. Ia dal·begipa a·gilsakoniko biapko ma·siagri miksongatangko sandina chonbegipa mandenade nengrabeani ong·jachim. Uani a·selan uamangba ia cholko ra·e an·tangtangni mikkangchi jikdongdebae janggi tanganinaba maiba gital ramarangko sandina mangsongjolaha. Ua miksonganiko ra·e uamang chel·begipa biapona re·angaha jeon uamangko saksamangba ma·sigipaaan grichim indiba uan A·chik jatrangni a·dok nalsaode ong·jachim enia ua songkoa Dimren A·dok ine

mingachim. Uamang ua biapo A-chik jatrangni dakugijagipa kamrangko a-bachengatna mangsonganiko ra-gataha, uarangara ja-kop gitcheamrangko koani enia knirangko rokanian ong-achim. Indake uamang gipinrangni ka-dingsteka enia chonnikako chakemangba kamtangtango bilsu gittamna kingking bimchipbee ka-aha. Uno dongengmitingo uamang an-tangtangni ka-satangtangna ka-pakade ka-pakbeachim indioba jena miksonge re-ongkataha ua kamba chu-sokkujachim enia uamang uchi re-bapilna inoba ja-mano ra-man dongmano maidake jikko deko aldumitanggenchim. Uidik dongoba dakchakgipa griode ia chasongode kamkoba man-na nengrabeani ong-jachim, uni giminan uamang jajrengataniko naljokatna mangmang jagittamprako sebichit kingprakko watatrongachim indiba biapko janapata dongjani gimin sechakatanikode man-sorongpajachim. Salsao uamangni antidamo ja-kop sikengmitingo kolre bolsa re-bae uamangni pilak dongbimangrangko gamgriaataha. Niamni a-palo kolreko sale gimaatgimin dongbimangrangni gamchataniko see un palo danggako gamskachina saltimgipako agannoara ki-sango asonggipa mandesa ong-katbae uamangni kosakosa dosiko gale ku-gipinchi saipetpetaha. Uni saia ku-arangna, ka-a chaktojae uamangba uko apsan ku-sikchin raprapari aganchakaha. Unon ja-kop sike cha-gipani kragija an-gipokni ku-sikko aganna man-aniko nike pilak antio donggipa manderang uamangko dongdu-ule nawang dake nitokaha. Enia ua mandeba kratcha-e miksichepchepe dake saltimgipakosa simsake salja ine manengskaa dakmike kolreo gadoe katangaha.

Salgipino ua kolreni nokgipa mande saksako watate uamang sakgniko an-tang nokona okamataha. Uni okamatako man-e Bilgrik enia Balikimba mamungnaba jajrenggijan un nokkona re-angaha. Uni nokona sokeon cholguga nokmikangni ketchio, "JAILER" ine dal-prete tape donako nikosa, ua kolre nokgipara ketchangdamni ketnokmasa ong-achim ine ma-siaha.

**Ketnokma:** - Nape asongbo jongrang.

**Bilgrik:** - Mitela, Sir.

**Ketnokma:** - Angkode 'Sir' ine okamnabe. Angasa na-songko 'Sir'

ine okamna nangachim.

Balikim: - Maina chingkora aganatachim, Sir.

Ketnokma: - Nibo, jongrang ia A·chik a·songo brange janggi tangenggipa chadamberang bang·bea, uamang an·tangtangni poraia·skia man·akon dal·nike ra·a enia uanon pangchake kam sandie man·jajokode a·mikbrang dakna a·bachenga, indiba iano na·song bida a·gitchapilen dongeba indaka kamrangko ka·e biltangtangko gamchatnike ra·a. Aiao, jongrang anga na·simangko ia kamna ‘Sir’ ine okamoba gisiktango mitelna skanikon bon·e parakna man·kujawa. Angni na·simangko mangsonge okamatanide indakesa ong·achim ia angni jail·o saksu pante gnang. Ua panteara uni bilsu chi·bonga ong·engpition mande saksako so·otaha enia bilsu chi·chetna jail·o donge da·alo saja matchote release ka·ako man·nasienga. Ua mandekoba rimange na·simang baksa done kam ka·atbo, ong·jaode uni tangkugni salrangkoba gipin asika dakenggiparang baksa jak on·pae ianonan sokbapilatnaba donga.

Bilgrik: - Bao biara? Rimbae niboching. (Ketnokma an·tangni manderangko watate uko rimbaataha).

Balikim: - Bikora mai mingachimsaimo ?

Ketnokma: - Chingade ‘105’ (Ek·so·panch) inesa okama indiba bimung chong·motde “DESKANG” ine mingakon.

Balikim enia Bilgrik : - (Apsan) Deskang!

Ketnokma: - Mai, na·simang biko rimangna man·jawama?

Balikim: - Aiao Sir, chinga biko rimangna kusi ong·begen.

Ketnokma: - De, na·simang uko rimangna namnikode nambejok, angaba na·simango indaken ka·dongsoengachim. Da·o bini iano donge kam ka·gipani gongsa gonggni tangka·paisarang dongakon ukoba ra·angbo. (Danggako bikote chane on·ata).

Ketnokmani nokko adita batbaahaon Balikim enia Bilgrik an·tangtangni ua biapona miksonge re·baaniko una talate on·aha. Deskang uamangni agana ku·arangko knamanahaoa noktangchina re·nade jechakbeaha enia an·tangni maikai ua a·selona sokaha uni giminba uamangna agana jechakaha. Indake ong·genoba Bilgrik enia Balikimni dra·anichi bon·kamao ua noktangchi re·bapilna ku·chakdraataniko man·aha. Da·o Deskang songtangchi re·pilani gimin chanchiatengon pilakna skangba an·tangni watbagipa ka·sabea ripengtang Rokimeko gisik ra·atengachim. Ua uni ketchangdamo dongmiting salrangoba uni bon·kame watbaan salo mikchidingding uni nirikanikoson gisikni janerao nikkamaiachim. Deskang da·o gisiktango chanchianiko dondikatna man·jaengahachim enia uachin Rokimeni gimin sing·sandaniko dakna ua dra·ataniko man·aha. Indioba Balikim enia Bilgrik sakgnian uamangni janggi tanga gimikon 'Rokime' minggipa bimungko knaan dongpakujachim. Uni sing·anina uamangni agnachakaniara Rokime minggipa me·chikde ua songo dongjaha inesan ong·achim. Uni miksonganiara Rokime siaha ba segipa ra·e gipin songchi re·angaha ine uni chanchianiona sokbae un' ka·tongko dipbikpilen bekningataniko man·aha. Balikim an·tangni ka·satang Sikimeko grongna sikbeahani gimin uko Kasinchimangni nokona re·bae an·tangko sengsochina ku·silitingo aganataha enia ua an·tangni chimonggimin danggarangchi una nambea ganna chinnanirangko breaha. Apsandaken Bilgrikba Kasinchina uni namnikgipa ganding chindingrangko brepaaha. Indiba Deskangde sana ra·bapagenchim, saksakam·kam ripeng dongpagipaba ru·utbee sengsodamna neng·nike gipinko ra·soaha inesa un' gisikode wingwange dongaiahachim.

#### CHAPBIDIL – 16.

Ku·a gital jakkalgiminrangni miksonganirang:

Ketnokma : - Jailer Ketchangdam : - Jail Ku·angipok : - English.

Saltimgipa : - Driver Kolre : - Gari Dongbimang : - Bostu

Gamgriata : - Nosto ong·ata.

Ku·siliting : - Telephone Dangga : - Tangka

**“SALIKIMNI BON-KAMGIPA SALRANG”**

Nokoni oang·katangaoni gimik bils i gittam jagni salchichetni ja·mano uamng Kasinchimangni nokona sokeaha. Indita ru·utbea salrangni ja·mano ka·satang Bilgrikko unsalosa niktaie Kasinchide kusi ong·dugaen ka·dingsimsimari ku·siktangko ku·kipnan changpiljaengjokchim.

Kasinchi: - Aiao, na·songkode angade bachibaan  
katchiptoksrangjokma inesa chanchipilengjokchimai.

Bilgrik: - Chingkoara gisik ka·tonggrie atchigiparang gita  
nikama?

Balikim: - Babamaangara da·ororode namtokpaenggenmasai?

Kasinchi: - (uamangni ra·baa te·spu,te·jingjang enia te·krimko dikkongo ra·bae) Maiko bisongkoara agankugen, nang·mani siani ja·mano darangba beng·na kangnagipaan dongjajok indaken salsisi chu ringsimsimen kamonikoba a·rikkala man·jok enia da·ode mande gitan niktokjaengjok. Na·a re·ange a·selrako mikkrontangchi nikeode aiao inmanpilgen. Je nang·pani namengmiting salrango chimonggimin gamrangkoba Saljatchian rusie bon·attokjok, da·ode nok ino nokbib i, bikapna agre gipin sikatdapanian griaha.

Balikim: - Aiao, indake ong·ode angade babako gronge kategalgalo namgenkon. Boning  
Deskangara ianon rosoaibone haida da·o on·tisani ja·manon Sikimeba sokbanaba donga.

Kasinchi: - Cha daka mangmangkode senge ringangchengboda.

Balikim: - Aiao, angade, re·angchengainok! Intango re·bapile ringeainaha.

Beanbebe nokona sokangeniora Kasinchini agannana batpilen dongchakram nokni grengna agrede uano mamung nitoanian griahachim. Re·anggin salrangode Saljatchia pagipani gamo asonge gangbo dake kangalrangko chonnikrongachim indiba ia salrangode kangalrang baksa besa kae an·tangba a·jak gamesa pagipakon alduengachim. Unsalo Saljatchi salgimik a·jak re·ange dangga gong sotchetko man·bapaahachim enia an·tangde neng·ahani gimin au·miksue neng·takna ine pagipako attamona merong ra·china antichi watatahachim. Pagipara churingtingtinge be·en bilgrie enia mikkronba name nikbrejae til·til tal·tal dake danggakon ban·oba gimaatsrangaha. Una ka·o nange Saljatchia pagipako saibengachim, unomitting  
Balikimba uanona sokeaha.

Saljatchi: - Baditan salgimik gramchi ding·ol napile kam ka·e ra·bae on·enga, uko mangmang wange cha·sonaba cholijaode mai daggipa budepasajok na·ara. Kam ka·naba man·jaode, bostu mangmangko ra·na watoba indake dakaiode na·ara maidakman·chagipa kamnasa cholignoksa. Angni salgimik neng·e kam ka·e man·bapaakode na·ade nengrachokchok gipinnasa galbrake on·baijokde, nambejok da·ode an·tangni galatangkon cha·bojok.

Balikim: - (jakpa doke) Namjok, dada namjok, indaka salko niknaan angaba ka·dongsopaengachim. Na·a skangode apani gamo asonge raja saksa ong·achim indiba na·ara a·king a·dokgrigipa songnoknisanchim. Nibo, na·a da·alo apako tangka gong sotchetmangmangna indaka kattarangko agannengjok indiba apa nang·ko skango indake saiachima? Da·alona kingkingba pilak an·tangni gamrangko rusigalan ja·manoba ua nang·ko unigimin ku·saba agankujaenga. Na·a da·osa tangka paisani gamchatako ma·sibaengama? Ia a·gilsako tangka paisako man·na nengrabeani ong·ja, pilakan ding·ol gramchi pakesa, an·tangni biltang baksasa uko sregrikna nangenga. Na·a skango obostarang namengpition iarangni gimin chanchie nina nangachim. Nibo, ia nang·ni gualanichian anga nokoni ong·katna nangaha enia ang' ong·katachi ama janggitangko galaha. Uarang pilakchin ia nokdang indonga

a·selona sokaha. Namjabejok ada, nang·ni daka namjabejok.

Ia ku·arangko agansrapkujaon ua jonggipani saiako chakna amjae gantong ge·sako kole uko skoo satkoraksrangaha. Balikim, “Aiao dada bilongen namjabejok” indi ine aganmangmangari aro gitilgropaha. Unomitingan Sikimeba adatang Deskangko rime unona re·baengachim enia ua dal·begipa a·sel uamangni mukkronni sepangon ong·ahachim. Deskang boningtangko detome Sanchakram nokona ra·angaha enia Sikimeba uko ki·sang ki·sang katrikangpaaha. Pagipade maiko dakgen ma·sijae, “Ia pilakan angni a·selan ong·aha” ine ka·tongbee jang·kepango asonggope dongrikaiaha.

Sanchakram nokona sokeon Deskang Santimgipa me·chikrangko gronge, man·a dipetde una nambata sannaniko on·pachina mol·molaha. Ua Santimgipa me·chikrangoni ma·mongara Aminchian ong·achim indiba uamang saksa sakgipinko ma·sigrikjaengachim.

Aminchi: - Mai ong·a, samingba dokgrikama?

Deskang: - Oe, adatanggipa Saljatchi doktoraka. De, iarangni giminde ja·manoba knana man·aigen indiba uni janggi mangmangko rakirikkuna gita ta·rakale sannaniko dakpabo.

Aminchi: - Oh, da·ode doctorba dongja enia iade ‘attempt to murder-sa’ ong·ani gimin policerangni a·bakusa. Uamangna skang chingade mamungkoba dakna man·jawa.

Sikime: - (Ja·manchake sokbae) Aminchi, na·a ka·sapae angni Balikimko ta·rake san·e namatpabo.

Aminchi: - Oh! Ia dokkropa man·gipara Balikimsama? Mikkang gimikon an·chirarasa ong·ahani giminan mandekon ma·sipiljajok. Nibo, na·song iako mandesa dokkropa ine gipinrangna agangenchimode police-rang enquiry ka·chenggijade chingade dangtapna man·jawa. Uni gimin tarake sannaniko nangnikode an·tangsa a·sel ong·a ba boloni ga·aka inerangsa doctornade



aganaibo, ong·jaode dokkropgipana skangde chingasa re·angchenggnok.

Sikime: - De, ong·aigenba. Chingaba biko dokkropgipani kosako mamung dakeba badi ka·na miksongani dongja indiba janggi mangmangko rakirikkunasan mangsongaia.

Aminchi: - (Dakchakgiparanko okamate susrangram dringchi ra·angate) Sikime na·a jajrengnabe anga bil am·a dipetde jedakeba jotton ka·e nigen.

Deskang: - Ong·ja, na·a jotton ka·mangmangainabe indiba jedakeba uko namatpilchongmotbo.

Aminchi: - Oe, angaba namatpilnade sikachim indiba na·aba ma·sia angaba bilni nalsaoniko dake janggiko on·pilna, janggini Nokgipade ong·ja.

Deskang: - Nang·na jegita tangka-paisa nanga ukode anga gamaigenchim.

Aminchi: - Anga nang·na aganman·aha. Angade sagipako san·gipasan, mandena janggiko on·na man·gipade ong·ja enia gipinrangko sanchina gita Government-an angna tangka on·enga. Uni kosako angna mamung nangdapanigri. (Susrangram dringchi napanga).

Deskang enia Sikime apalo sengsoaha enia susrangman·an ja·mano uko donjinman dringona ra·angaha. Bilgrik enia Kasinchimangba gipinrangni agana ku·aoniko knae siketbaket unona sokbaaha. Uamangni sokbaona kingkingba Balikimde mikselsokujaengachim. Unomiting mande saksa re·bae Deskangko jakjipate, “Nang·ko uchi okamatenga” ine aganeaha enia unbaksa Bilgrikba re·angpaaha.

Deskang: - (Cholgugaoni nau·e) Mainabachima?

Aminchi: - Napbabo, Balikimko iano nolnapatgipani bimungko

segate dona nangengachim. Da·ora sing·teka gita nang·kora mai mingachimsaimo?

Deskang: - Angkode Deskang ine mingachim.

Aminchi: - (Nawang dake) Deskang! Sawa Deskang, Sikimeni adatanggipama?

Deskang: - Oe, Sikimeni adatanggipa Deskang, indiba na·ara maina angni gimin sing·sandiniko dakenga. Ma, na·a angko ma·siamas?

Aminchi: - (Rang·gitik mikkrononi singsolbaenggipa mikchirangko u·site, dokraoni sean ge·sako bikote) Na·ara ia pen·ko gisik ra·kuengama?

Deskang: - (Chanchibeoba gisik ra·atna man·teljae) Ia pen·ko mesoke nang·ni angko siang·ani miksonganikode angade ma·sijajok enia chanchibeoba iani gimin gisik ra·ataba grijok.

Aminchi: - Indake ona·ode angni nang·ko sengsoanide indinsa ong·aijok.

Deskang: - Oh, na·ara uni giminsa aganengachima? Da·sioniba name paraksrangbochim. (Dokratangoni tangkako bikote channa).

Aminchi: - Na·ara nang·ni Rokimeko gualjokma? Angan nang·ni Rokimechimba.

Deskang: - (Nawang dake) Na·a angni Rokime!

Aminchi: - Oe Deskang, angan nang·ni Rokimechim.

Deskang: - (A·achiko nikome) Na·a Rokime ong·oba, da·ode na·ara gipinnisa ong·enggnok.

Aminchi: - (Mikchi u·site) Deskang, angara da·onaba segipa ra·gija, nang·kon me·tra ong·e sengsokuenga.

Deskang: - Nang·ni angko sengsoanide indinsa ong·aiaha. Na·ara

namoba namjaoba an·tangna kride mikkron nikpajok indiba angade mni salmangmangosa jailonian jokbaa. Uni gimin angna chanchiako gale na·a gipin nang·ming apsanako sandie ra·bo, ong·jaode nang·ni janggi tanganide indinsa nasiainok.

Aminchi : - Mainasa nang·kora jail·ora donskajok?

Deskang : - Iani giminde ka·sapae sing·panabe maina ian angni janggi tanganiona sesogiminan ong·ahachim. Anga unsalo nang·ko wat·e re·angan ja·mano an·tangni rasongko ramao grongaha enia ua angko bilsa chichetna kingking jail·ni dring kitikbrio asongataha. Iana agre anga uni giminarang saksanaba mamungkon agandapna nangnikja.

Aminchi : - Na·a jekon angna aganaha uan angna chu·ongbeaha enia uni kosako sing·daptaijaniba dongjawaha, indiba je me·asan angko bilsa chi·chetna kingking duk man·bee sengsoatahachim ua apsan mande da·alo piltai angoni chel·e re·angna man·aijawaha.

Deskang : - Nang·na angara maiko maidake agandapkugen.

Bilgrik : - (Golpo manteljae) Oh, na·ara meja·salora bikosa chingo sing·achimkon, chingara Rokime inani gimin ma·siskajajok.

Aminchi : - Indake ong·ode Deskang na·aba angna ka·sakuenga. Na·a angna ka·sajaha ong·ode mai nangana na·ara angko sing·sandigenchim. Mejaonin angni ma·apade angkode nama namja sikakoba sandie ra·bojok ine aganengaha. Da·ode na·a re·baahani gimin ua sing·anina aganchakanikode jajrenga grian man·aignok. Indiba.....

Deskang : - Mai indiba?

Aminchi : - Kema ka·pabo, indibani miksonganide anga nang·ni jail·o dongna nangani a·selkosa ma·sina sikengachim.

Deskang : - (Mikkang simprakke) Oe, beben, anga iani gimin parakna sikjaoba na·a sing·ahani gimin nang·nade aganan

nangtelaignok. Anga ianoni re·ange mamungkoba sing·chenggija bus nikao joljol gadoe re·angaha. Ua angni gadoanggipa bus·ara Dimren A·dokona re·gipa ong·achim enia uano tangka gong Ritchasako game re·na nangachim. Indioba angora nang·ni tangka gong sot·dok on·natgipana agre mamungan dongpajachim. Uani a·selan anga rama tong·saon arikgalaniko man·aha, enia indake angara ua buring a·jangchio maikai saksan dongrikenchim, apsan dake ge·gipin bus·ko sengsoe gataina inoba uandaken ong·taigenchim. Uni gimin anga ua bus·o tangka giltimgipani ja·ako rim·e angko gat·pakuchina mol·molbeachim indioba ua nang·ni angna on·atgipa ghoriko bus·na tangka gamani palo on·skachina bi·aha. Jekon anga janggi sipilgenona dakna am·jawachim. (Nikome kik·kikari grapa).

Aminchi : - (Pakkreo rime, sikjengjenge) Uni ja·mano mai ong·aha, de, aganbo.

Deskang : - Unikoa ua bus·o tangka giltimgipa angni jakoniko ua ghoriko sekdrana jotton ka·aha. Uni gimin anga uko sikipakwattahachim indiba da·nang rasong gribee ta·rake ramako re·baenggipa truck unkosako re·dapangaha. Ua a·sel ong·ani da·alona kingkingba ang' mikkronni sambaon ong·engpiti enia uachin bils chichetna kingking kitikbri dringo dongchina angko seaha, jekon a·gilsako chasongnaba gisikni ki·taponiko kimitna man·jawaha.

Aminchi : - (Mikchi baksa ka·dingsmite) Aiao! Deskang na·ara angna indakpile ka·saa enia uani giminan ua gamchata grigipa ghorige·sachimangmangan janggitangko srena nangnikaha. Da·o angara ia nang·ni ka·saanina maichi maiko dake jakchotpanok gose. Oh, angaba nang·na ka·saachi janggitangko gima·atna man·genchimode....(Deskang un' ku·sikko jakpachi peng·ata).

Deskang : - Je ong·ahade, ong·aha uko unon bon·china on·bo. Da·o nang·ni kakket ong·e sengsoe gital janggiko on·taianian angna chu·ongbea enia iana agre ka·saani dal·batgipa sakkia mai dongkugen. Nang·ni janapa gita sianide bon·kamgipa ka·saani sakkisan ong·a. Siachi mande kalimanikosan ra·baa enia ka·saani

bimang katchaani chimiksan ong·a uni gimin ia ka·san chimikko tipchanggiya jockamjringna on·bo enia a·gilsakni manderangko uno dubiatbo.

Unomiting chelchaktim saksa gansko gilgep dakako stike enia miktikkol gisimko gane re·bae ping·tipko kinggilake, “Anga napna man·genma?” ine sing·aha. Ua chelchaktimara aditan changroachim enia ku·sikni kosako on·tisa ku·simangko branachim.

Aminchi: - Nap·abo Sir, mainaba nangachima?

Chelchaktim: - Anga ianoni Circle Inspector ong·enga. Nang·ni patient Balikim minggipako ninasa re·baengachim indiba na·a jajrengna nangjawa, maina anga enquiry·kana miksonge re·bajaha enia iani gimin chingni department·ona mamung information·ko sokata dongja.

Aminchi: - Hai ninakode re·bo Sir, (Jinmaan damsan Balikimko don·gipa dringona re·angha. Uano Kasinchi Sikimeni grapengako mol·molsobengachim).

Aminchi: - (Dringona nape) Nibo, iakai Balikim enia ua da·onaba mikselkujaenga.

Chelchaktim: - (Sepangona re·ange uni ku·dipeo rim·e) Ong·ja Sister, ia mande chasongnaba mikseljawaha. Nibo, bini ku·sikoni an·chirangba ong·kataha.

Aminchi: - Ha, da·siode ku·sikoni an·chi jokade grichim!

Chelchaktim: - (a·o ga·akgipa nikteko kole) Nibo Sister, iara injection on·ani samsachim enia iano samba dongjaha.

Aminchi: - Indake ong·ode nang·ni miksonganiara, bian unoni samko ringahama?

Chelchaktim: - Ringaha, bian ringaha. Indiba Sister, ian nang·ni a·sel ong·jaha. Haida iano dongenggipa me·chikrangni giminsa ong·engnaba donga.

Sikime enia Kasinchi: - (kenna gnang mikjrao dake chelchaktimko nitate) Ong·ja Sir, chinga biko mamungba dakjachim.

Chelchaktim: - (Sikimeko nie) Oh me·chik, na·ara maina indakpile grapenga.

Sikime: - Angan ia me·sako do·sinakenggipachim. Angade da·o bina duk man·beesa grapenga.

Chelchaktim: - Ha, na·a bina duk man·esa grapenga ong·ode, maina bioni inditan chel·begipa biaposa kalimaniko dakenga. Ong·ja me·chik na·a da·o bini gimin duk man·an baksana maiba suk ong·dapgijanirangkoba man·chongmotenga. (Kasinchichiko nitate) Na·a da·o iano ia me·chikni maiba knakugijagipa kattarangko janapahama? Nibo me·chik, anga pilakon ma·siangengaha, uni gimin na·a donugija kakketkon paraksrangboha.

Kasinchi: - (kenna gnang) Oe beben Sir, ru·utbea bilsirangna skang Sikime Disen minggipa pante saksamung inditan meligrikbegipa ripengrang ong·achim. Indioba salsao Sikime Balikimko grongha enia unsal intalan ua me·asa biko wat·e re·angaha. Adita salrangni ja·mano ua me·asa angna chitti kingsako see donangaha enia ua chittiko poraie nion ua me·asara Sikimeko mikcha namnikachim ine ma·sina man·aha. Indiba iani gimin Sikimede mamungkoba ma·sipajachim. Uni giminsa da·o anga iako bina aganaha enia uanasa.....

Chelchaktim: - (Sengsrapgija) Uanasa da·o ia me·chik grapenga enia na·simangni golpoengmitingo Balikim mikselahachim indiba sadika am·jaanasa mikchipe dongengachim. Na·simangni pilak golpogipa kattarangko biaba knaaha enia Sikimeni duk ong·ako nikna sikjaesa bia samko ringe siaha maina bia an·tangan indake ma·siachim, “Anga da·o tangpila ong·oba skangogita name an·senge

tangna man·jawaha. Uni gimin anga sisrangan nambatgen. Sikimeba angna bate Disennan ka·sabatenga maina da·o anga bini sepango saknaako man·bengomangba angko nigalpilen unasa grapenga enia unbaksana ua me·asa gipin jawa ong·ja angni jonggipan. Angade namoba namjaoba chonaonin apa baksa dongpae adita kusinirangkode man·aha indiba biade da·nang janggi tanga gimikan duk mikchi rarakosa man·aajok. Apsan dake anga janggitangko tange rakkikugenoba chinga adasani gisepo katchagrikianian dongjawa enia Sikimenaba dukni rarasa ong·aigen. Uni gimin anga Sikimeko Disenan pakwat·e janggitangko so·otainok” indi ine ua inject ka·ani samko ringe siaha. Oh da·nang bisong nokni golpode da·a-salon pilakan bon·aha!

Bilgrik : - Mai, adagipakoba arrest ka·srangahama?

Chelchaktim: - Adagipa noksamo ka·e siaha enia pagipa nokko doge ketchange an·tangko so·chipe sisrangaha. Oh, da·nang! Sakantian saksa sakgipinni siani koborko knagrikgian damsan a·sako watangaha. Haida da·o me·mangchisa damsan gronggrike ramaosa jegrikroroe a·songtangona re·angtokengnok!

Sikime: - ( Balikimko sikjengenge ) Balikim na·ade angko saksan watgale re·angaijokma? Na·ara nang·ni jonggipa Disenko nikjoko angko do·sina amachimba , indiba na·ade da·oa jonggipako grongna skangan a·gilsakko wat·e re·angaijok!

Chelchaktim : - ( Gansko enia miktikkolko oke ) nibo Bilgrik, anga nang·na salsao aganachim, angni a·gilsako ja·manchakdugae atchianichi anga pilakon ja·manchakaha. Da·aloba ja·manchakdugaesa sokbahani gimin apsandake pilakon gimaataiaha!

Bilgrik : - Oh, na·ara Disensamo?

Disen : - Oe, ripeng anganchim. Ia pilak a·gilsako dongenggipa rasong grigiparangni raja, Te. Disen. (an·pile re·anga).

Sikime : - (Katrikbae) Disen, nang·ni adatang Balikimde nang·nan

angko pakwat-e janggitangko galaha, indiba da·oa na·ade angko wat-e r·angengjokma?

Disen : - (Mikchi usite) Sikime, na·a indake dakna nangjachim.

Sikime : - Ong·ja Disen, ia pilakan nan·gni a·selsa ong·aha. A·bachengon na·a an·tangni ka·saako angna parakgengchimode ia pilak a·selona sokbanan nangjawachim.

Jangrik : - (Nocheko rimbite re·bae) Ia pilakan ong·na nanga gita tiktakan ong·aha. Uani gimin na·simang chanchie sko sachanabea. Indiba Disen ia nang·ni nogipa Noche dongengpiti uni giminsa chanchibo, haida bi·ko na·a ma·sijaengnaba donga, ian na·songni ba·rimade ong·ja indiba nang·pani jikgitalni, chong·motan nang' ma·detangni saksakam·kam de·mechik ong·a, jean a·gilsako nang·na agre pilakon gimataha.

Disen : - Ah angni nogipa! Angade angni ma·sibachengaonin darangkoba dada·abi, nono·jojong enia ama·apa ine okampaen nikkuja. Da·o je adatangrang dongpachim ukoba manggisi rarakosa grongaijok enia pagipakode mikkangkon nikgija dimjra, dimjra ching·enggipa wa·alonikosa 'apa' ine okame reba·aijok. Indiba da·oa angni nogipaba dongkuenga ong·ode angna baditan kusini.

Noche : - (mikrona mikchian gape) Dada, na·a angkoba nang·ni nokchina re·pana on·genma?

Disen : - (Singsolbaengipa mikchiko u·site) Na·a angko dada ine okameba, adatangni nokchina re·namangmangba angni rimaniko nangkuengama? Hai Sikime, Nocheko rime ang` nokchi re·babo.

Bilgrik : - (Chel·kalaoni rakbee) Sengkubo Disen, ia nang·ni boning, Deskangode saksan galangna siengama?

Disen : - Angni boning Deskang! (Sikimechiko nie) Sikime, na·ara nang·ni adatanggipani re·bapilani koborko angna donuengachima?

Sikime : -Uko janapna gitamangmangba na·an on·tisaba agitchaa



salja·kukon angna on·jaengajokona, basako maidakgipa salja·kuo angkora aganatenga.

Deskang : - (Sepangona re·bae jakrime) Disen. na·a angni dongjamiting salrango angni nogipako namen simsakbee rakkiaha enia dingtang dingtang neng·nikanirangkoba dakchakbeaha. Uni palo ka·sae nang·na on·pilskana, angode mamungan gri.

Disen : - Angnade nang·ni nogipa Sikimeni ka·saana agre mamungkoba nangdapjawa, indiba na·a on·pilskaani gimin chanchienga ong·ode Aminchinasa jekoba chanchibo maina angna batede bian dakchakaniko on·bataha.

Deskang : - Nang·ni enia Aminchini ka·tong apalbea. Aminchia nang·kosa an·tangna bate una dakchakbataha ine aganaha enia na·ara bikosa indake aganskaaha. Nang·ni aganna gitan angaba on·pilskaani palo bina ka·tongtangko on·skaengaha enia ia chinga adasana sesogimin joraranga mairongpile namgipa ka·tongrang ong·a. Iana anga pilaie ia a·sako rasong chabea.

Bilgrik : - Nibo, Disen na·a salsao an·tangni ja·manchakdugae atchianichi pilak kamon ja·manchakenga ine angna aganahachim, indiba da·alo na·a uachi namgniko man·skaaha. Haida na·aba seng·gnangkale atchia ong·ode cholikalgipa nokdango dongpae indaka a·selo bak man·panaba dongachim.

Disen : - Haida ukode seng·gnang atchie niosa ma·sigenchim. Hai pilakan angni nokchi re·sochimbo. Da·o anga apani enia adatang sakgnini manggisiko ra·e re·anggen.

Deskang : - De, Jangrik na·a me·chikrangko rime re·sodilbo. Chinga Bilgrikming sakgni Disenko dakchakna re·anggen.

Manggisirangko ra·ange salgipino gopaha. Pilak kam matchotan ja·mano Bilgrik, Kasinchi enia Jangrikna agre gimikan Simsang A·dinggreko wat·e Nokrek Medan Gittimona re·angtokaha. Nokona sokeahaon Deskangko niksoe ma·apa enia pilak songni maharirangan kusi ong·tokbeaha indiba Balikimni sian

ku·ako knae uni pilak songo agananggimin ku·arangko gisik ra·ate  
 una duk man·chaktokbeaha. Ia a·gilsako mandeni janggi tanganide  
 indakesan ong·aia. Sanaba dukni ong·ode sanabade kusini enia  
 sanaba gimaani ong·ode sanabade man·dapgni ong·skaa.

## CHAPBIDIL – 17.

Ku·a gital jakkalgiminrangni miksonganirang: -

Te·spu : - Apple.      Te·skem : - Naspati,      Santim : -  
 Nurse,      Gansko : -Tupi, Chelchaktim : - Police  
 Samgran-oja : -Doctor, Sandi daka : - Enquiry, Nikte : -  
 Bottle      Ka·bidingdam : - Department,  
 Te·jingjang : - Letchu,      Ping·tip : - Purdha,  
 Jakrim : - Salam,      Knanku : - Kobor,  
 An·gilsuani : - Injection.  
 Wilwilako nirokgipa: - Circle Inspector,

---

## BON·JOK.

### A·BACHENGANI

A

A·bim : - Globe,  
 Aema-ditma: - Sagal  
 Adikprak : - Minute (Time)  
 An·kru : - Chola  
 An·gil-Su·ani : - Injection  
 Am·pokma dokro : - Bench  
 A·rongginde : - Cement  
 Arimprak : - Hour (time)

B

Balwaku : - Radio  
Baljagring : - Television  
Bila·nok : - Government.  
Bolpilma : - Table  
Borom/Kal·borom : - Football

C

Chapbidil : - Chapter  
Chanan : - Tarik (date)/Number.  
Chapmong : - Kitap  
Cha·bitchil : - Dalim bite  
Chelchaktim : - Police  
Chidokra : - Wat·er bag

D

Doksliting : - Guiter  
Dongbimang : - Bostu  
Doktekra : - Type-writer

E

Enia : - Aro

G

Gansko : - Tupi  
Gam·pret : - Microphone  
Gianing : - Budi/ Idea  
Godok : - Cricket  
Golsil : - Gojal / Nail  
Guama : - Coconut  
Guchon : - Kejul

## J

Jabimang : - Photo  
 Jarongdik : - Photo Album  
 Ja·kep : - Sandal  
 Jawilwat : - Cinema  
 Jachipchang : - Camera  
 Jakgotek : - Carom  
 Jakrikra : - Secretary  
 Jangwat : - Loud-speaker/Speaker(sound)  
 Ja·pindap/Ja·cholchop : - Long pent  
 Jakrim : - Salam

## K

Ka·bidingdam : - Department  
 Kagrip : - Dala (lock)  
 Katomra : - Bag  
 Kambite : - Result  
 Kal·ram : - Playground  
 Ping-tip : - Purdah  
 Ketchangdam : - Jail/Lock-up  
 Kepchit : - Kenchi  
 Ketnokma : - Jailer  
 Knanku : - Kobor  
 Kolre : - Gari  
 Kolre Kapram : - Gari Station  
 Ku·minga : - Poraia  
 Ku·pea : - Translation  
 Ku·a : - Katta  
 Ku·srea : - Golpo ka·a  
 Ku·sliting : - Telephone  
 Ku·chipra : - Tape Recorder  
 Ku·chipchang : - Cassette  
 Ku·angipok : - English  
 Ku·japinik : - Director  
 Ku·bimik : - Grammar  
 Ku·diktom/Ku·bidik : - Dictionary

M

Matdon : - Zoo  
 Ma·ski : - Madam  
 Matja·gol : - Giraffe  
 Matsaltong : - Zebra  
 Matchi/Matdi/Matching : - Yak  
 Matnokma : - Singho  
 Matdebra : - Kangaroo  
 Ma·ambi : - History  
 Mikjaparak : - Second (time)  
 Miknik : - Glass

N

Nikte : - Bottle  
 Nian : - Exam/Porika  
 Nolnapata : - Admission

()

O an : - Chabi (key)  
 On·srea/Ra·srea : - Koros ka·a  
 Opwal·ku : - Cigarette

P

Palchakra : - Canteen/Dukan  
 Paltak segata : - Form-fill-up  
 Panokma : - Raja  
 Paski : - Master  
 Padot : - President  
 Pe·rel : - Screw Driver  
 Pringrama : - Morning walk  
 Pringnam : - Good-morning  
 Ping·tip : - Purdha

R

Ra·rura : - Peon  
 Ra·dedo : - Promotion

**Rengrengsil** : - Cycle  
**Renggatsil** : - Rickshaw  
**Rengtengsil** : - Kanta (bell)  
**Ri-ilchi** : - To (oil)  
**Rongsikra** : - Result booklet  
**Rongsika** : - Passed (exam)  
**Rongnangja** : - Failed (Exam)  
**Rong·anggal** : - Koila

## S

**Santim** : - Nurse  
**Samgran-oja** : - Doctor  
**Salja-ku** : - Somai  
**Saltokru** : - Ghorī  
**Saltok** : - Calendar  
**Salbari** : - Elastic (rubber)  
**Salniatram/Salre·atram** : - Park  
**Salneng·tak** : - Holiday  
**Sakkrit** : - Gilja  
**Sandi daka** : - Enquiry  
**Sean** : - Pen  
**Sechit** : - Lekka  
**Sebichit** : - Chitti  
**Sechimra** : - Bohi  
**Sedoktek** : - Typist  
**Sepileng** : - Slate/Blackboard  
**Silwel** : - Screw  
**Sing·sandi** : - Bichal ka·a  
**Skiannok** : - School  
**Siktaninga** : - Mikosto ka·a

## T

**Te·spu** : - Apple  
**Te·krim** : - Naspati  
**Te·jingjang** : - Letchu  
**Tomtoma** : - Motor-bike  
**Totmare** : - Haturi  
**Traski** : - Miss.

U

Uian a·bimik : - Primary School

Uian Ma·jatchi : - U.P. /Middle School

Uian saka : - Secondary/high school

Uianmong : - College

Uidik : - Bida

Uidik : - Class e.g. (1) Uidikchi re·anga= Class-chi re·anga ba  
napanga.

(2) Uidikni salja·ku = Class-ni somai.

Uian : - Class e.g. Uian-chet= Class-VIII

W

Wal·nat : - Torch light

Wal·bim : - Light bulb

Wal·nok : - Lamp

Wal·jrong : - Plastic

Wal·chi : - Kerosine

Winan : - Chatta (Umbrella)

\*\*\*\*\*











**KINGGIPIN TA·RAKEN SOKBAENGGIPA NOVI L**

# **WAL·MINDIK A·GILSAK**

(“.....ama ang a-sako at hiamu at hiamu i  
dosichim..... ....?!”)

**DRAMA TYPE-A·CHIK NOVEL**

By,  
**Barnath / Sangma,**  
**Noki' A-we,**  
**Williamagar**